

道光肇慶府志

肇慶府志卷十八

人物一 漢 吳 齊 唐 南漢 宋 元 明

陳欽 子元 漢 士燮 吳 張岳 俱封川 齊

何如瑛 新興 陳頤 李謹微 俱德慶

莫宣卿 莫休符 陳萬言 王國材 俱封川 以上唐

陸光圖 四會 南漢 梁頤 子揆 梁弼直

綦毋慮 羅隱孫 俱高要 李士廉

李積中 李大性 俱四會 韋君載 陽春

曾躍麟 陳嘉猷 梁作心

林觀 俱陽江 李英 梁順孫

黃執矩 譚惟寅 俱高明 陳元輔 鶴山

石處道 李熙載 樂夔

伍士階

梁夢奇

陳讜

謝文晏

謝復生

談文炳

梁畿

莫天祐

俱封川以上宋

梁國傑

陽春

李梅國

陽江

劉青

高明

梁全

郭友

戴元

梁仕亨

俱德慶

李逢邱

開建以上元

梁敏

梁祖榮

余存諒

鍾瑛

梁軫

葉貞

何經

陳宣

謝永安

李顯

梁致育

李魁

程文

吳尙質

梁伯鴻

李實

梁玠

李一龍

潘節

吳赴

陳輅

謝宗孔

麥孟陽

鄧崇德

姚仲韶

羅一中

陳九成

區廷芳

鍾大咸

謝明德

阮金

黃虞龍

梁廷芳

羅成功

李廷材

李初榮

黃焜

俱高要

陸達人

林用章

劉德

陳迪

呂斯美

盧剛

林資

林全

劉澄

李宗林

鄭彤

李道全

林世遠

歐陽福

李津

簡篤敬

李槩

蔡文瓚

梁紹唐

盧宅仁

梁素

李文盛

吳鴻逵

李傑

林長清

陸表

鄭裘

李燦日

吳士耀

梁千鍾

郭永達

黃鶴年

楊蕃

李夢賦

黃上泰

蕭騰舉

譚騰堯

陳永繩

陸中成

陳海

蘇忠

李芳春

簡聯

俱四會

劉簡

梁新

陳鼎

張聰

嚴貞

黎常

馮文暉

潘游

簡直

李元傑

柯英

趙良詵

黎時中

劉夢賜

梁玠

黎王臣

彭津

趙羽

歐鎡

梁儲臣

飭載道

陳濟

麥子仁

趙良學

伍啟泰

顧鳴鸞

潘夔

王臣丹

潘毓珩

蘇宇元

俱新興

崔士暉

林桂

徐洪

吳紀

劉廷亮

梁棟

汪漢

嚴儀

賴麒

賴玉德

謝

詔

何萬邦

汪雲梓

謝詵

伍聚奎

胡秉忠

梁崇伯

張所學

陳諫

楊鳳鳴

梁應材

羅光岳

謝良垣

鄭國一

何謙

伍賢

黃裳

楊鳳麟

梁之屏

黃守誼

汪萬垓

謝鏜

謝鑛

梁燧

張宏位

謝之棟

劉裔灼

歐陽念

陳炳璿

俱陽春

林茂

徐鼎

徐季

劉源

陳衡

沙浩

劉芳

鄭致和

劉竑

支榮

陳璘

陳桂芳

林接雲

許信

劉琳

羅士毅

岑經

趙世清

施孔儉

蘇復生

劉景康

李天培

羅尙質

徐鳴陽

許效忠

蘇復光

黃尙彩

梁澄

姜仁浩

林鳳翀

李天毓

陳登雲

李天材

梁拱極

梁樞

蘇光軾

杜穎昌

何如禮

林高標

馬如龍

譚瑞龍俱陽江

譚克忠

謝迪

黃袞

何珍

嚴纓子逢逾

譚南昌

林鴻

譚維城

楊楚

嚴貫

李邦祥

譚果

楊衡

譚宗懿

區日琳



譚起

嚴相

區益

羅黃裳

羅煥章

何天衢

楊紹程

嚴節

嚴機

譚舜典

何一麒

劉徵

劉時可

區大樞

區大相

區大倫

黎衷

譚大寧

弟邦傑附

楊休

劉覺

嚴孔章

區大成

區金龍

羅儀

區配乾

譚大智

何惟恕

區懷懿

關捷先

嚴耀初

黎天相

區懷瑞

區懷年

莫禦

嚴學思

王邦鎮

王應楨

黎士楚

麥而炫

國懷吳

楊從堯

程本

李順

李文璧

楊維福

謝振宗

譚相國

區光表

俱高明

唐華

鄭履祥

莫如士

莫如善

鄭文

唐賓

唐淳

陳元璞

馮邃

梁以絢

張斗南

鄭坤元

馮士奇

馮登雲

吳濟之

鄭奎光

譚虬

梁維棟

梁銓

俱恩平

龐尙鴻

陳道同

蘇忠

黃約

梁維梓

李大柰

周達仁

周裕廷

高鵬

楊元美

俱廣寧

梁臨

張天統

張紳

梁繼灝

吳韜

張紀

梁惠

余諒

羅素

何述

陳經綸

余統

李興

李文明

余敬

張璧光

關中

馮殷

李江

倫大禮

李逢年

楊景辰

許相

鄺達禮

司徒綬

許培之

張鴻

許炯

何熊貞

陳璣

勞士傑

馮八秀

馮宇志

李渭

施用

劉文瑞

楊英

易之教

羅兆鵬

容瑞

勞守謙

容瀚

古天祐

吳應鴻

陸象賢

倫肇修

任六推

吳馴

任鳳翔

易奇際

施應岳

易鏞

易易九彬

易文炳

馮一夔

吳猷

俱鶴山

李質

伯震

李穆

陳立

王制

曹昌

王瑋

謝澤

陳衍

張淵

徐璋

梁東之

王朝臣

謝恩榮

張汝秀

劉楊

陳天華

鄧牆

梁崔

梁滔

陳沛

謝球

陸世鍵

陳守基

陸大成

戚大勲

歐萬顯

徐有爲

杜英

梁大同

劉大禮

劉勉

謝君言

梁梓

梁普

俱德慶

蒙端

李信

岑哲

陳錠

蘇喬

蘇夢陽

楊賢

陳廷俞

陳天瑞

岑一麒

葉高

葉日煥

八天培

陳道蘊

俱封川

莫士忠

莫敏

陳義

陳顯

陳譽

植以進

張子奇

陳元昭

黃璉

張應蘭

侯用采

侯用賓

侯應遜

侯應選

侯應達

饒志學

饒家慶

李東陽

鄧士新

陳大倫

鄧起龍

侯世勲

俱開建

漢

蒼梧陳欽

漢書儒林傳

字子佚

釋文

王莽從欽受左氏學以欽為

厭難將軍

儒林傳

自名陳氏春秋

後漢陳元傳注

陳元字長孫蒼梧廣

信人也

今封

父欽習左氏春秋事黎陽賈護與劉歆同時而

別自名家元少傳父業為之詰訓銳精覃思至不與鄉里通

以父任爲郎建武初元與桓譚杜林鄭興俱爲學者所宗時  
議欲立左氏傳博士范升奏以爲左氏淺末不宜立元聞之  
乃詣闕上疏曰陛下撥亂反正文武並用深愍經藝謬雜真  
僞錯亂每臨朝日輒延羣臣講論聖道知邱明至賢親受孔  
子而公羊穀梁傳聞於後世故詔立左氏使詢可否示不專  
已盡之羣下也今論者沉溺所習翫守舊聞固執虛言傳授  
之辭以非親見實事之道左氏孤學少與與猶遂爲異家之  
所覆冒夫至音不合衆聽故伯牙絕絃至寶不同衆好故卞  
和泣玉仲尼聖德而不容於世况於竹帛餘文其爲雷同者  
所排固其宜也非陛下至明孰能察之臣元竊見博士范升  
等所議奏春秋左氏不可立及太史公違戾凡四十五事按  
升等所言前後相違皆斷絕小文嫫黷微辭以年數小差掇

爲巨謬遺脫纖微指爲大尤抉瑕摘釁掩其宏美所謂小辯  
破言小言破道者也升等又曰先帝不以左氏爲經故不置  
博士後主所宜因襲臣愚以爲若先帝所行而後主必行者  
則盤庚不當遷於殷周公不當營洛邑陛下不當都山東也  
往者孝武皇帝好公羊衛太子好穀梁有詔詔太子受公羊  
不得受穀梁孝宣皇帝在人間時聞衛太子好穀梁於是獨  
學之及卽位爲石渠論而穀梁氏興至今與公羊並存此先  
帝後帝各有所立不必其相因也孔子曰純儉吾從衆至於  
拜下則違之夫明者獨見不惑於朱紫聽者獨聞不謬於清  
濁故離朱不爲巧眩移目師曠不爲新聲易耳方今干戈少  
弭戎事畧戢留思聖藝眷顧儒雅採孔子下拜之義卒淵聖  
獨見之旨分明黑白建立左氏解釋先聖之積結洮汰學者



之累惑使基業垂於萬世後進無復狐疑則天下幸甚臣元  
愚鄙嘗傳師言如得以褐衣召見俯伏庭下誦孔氏之正道  
理邱明之宿冤若辭不合經事不稽古退就重誅雖死之日  
猶生之年也書奏下其議范升復與元相辯難凡十餘上帝  
卒立左氏學太常選博士四人元爲第一帝以元新忿爭乃  
用其次司隸從事李封於是諸儒以左氏之立論議謹譁自  
公卿以下數廷爭之會封病卒左氏復廢元以才行高著名  
辟司空李通府時大司農江馮上言宜令司隸校尉督察三  
公事下三府元上疏曰臣聞師臣者帝賓臣者霸故武王以  
太公爲師齊桓以夷吾爲仲父孔子曰百官總已聽於冢宰  
近則高帝優相國之禮太宗假宰輔之權及亡新王莽遭漢  
中衰專操國柄以偷天下况已自喻不信羣臣奪公輔之任

損宰相之威以刺舉爲明徹訐爲直至乃陪隸告其君長子弟變其父兄網密法峻大臣無所措手足然不能禁董忠之謀身爲世戮故人君患在自驕不患驕臣失在自任不在任人是以文王有日昃之勞周公執吐握之恭不聞其崇刺舉務篤察也方今四方尙擾天下未一百姓觀聽咸張耳目陛下宜修文武之聖典襲祖宗之遺德勞心下士屈節待賢誠不宜使有司察公輔之名帝從之宣下其議李通罷元後復辟司徒歐陽欽府數陳當世便事郊廟之禮帝不能用以病去年老卒於家子堅卿有文章

後漢書本傳

按范書云以父任爲郎後辟司徒歐陽欽府陸德明經典釋文云司空南閣祭酒陳元此可補范書之缺

阮通

志

吳

士燮字威彥蒼梧廣信人也其先本魯國汶陽人至王莽之  
亂避地交州六世至燮父賜桓帝時爲日南太守燮少游學  
京師事潁川劉子奇治左氏春秋察孝廉補尚書郎公事免  
官父賜喪闋後舉茂才除巫令遷交趾太守弟壹初爲郡督  
郵刺史丁宮徵還京都壹侍送勤恪宮感之臨別謂曰刺史  
若待罪三事當相辟也後宮爲司徒辟壹比至宮已免黃琬  
代爲司徒甚禮遇壹董卓作亂壹亡歸鄉里吳書曰琬與卓  
於琬甚有聲稱卓惡之乃署敎曰司徒孫士壹  
不得除用故歷年不遷會卓人聞壹乃亡歸交州刺史朱  
符爲夷賊所殺州郡擾亂燮乃表壹領合浦太守次弟徐聞  
令黼領九真太守黼音於鄙  
切見字林黼弟武領海南太守燮體器寬  
厚謙虛下士中國士人往依避難者以百數耽玩春秋爲之

注解陳國袁徽與尙書令荀彧書曰交趾士府君旣學問優博又達於從政處大亂之中全保一郡二十餘年疆場無事民不失業羈旅之徒皆蒙其慶雖竇融保河西曷以加之官事小閑輒玩習書傳春秋左氏傳尤簡鍊精微吾數以咨問傳中諸疑皆有師說意思甚密又尙書兼通古今大義詳備聞京師古今之學是非忿爭今欲條左氏尙書長義上之其見稱如此雙兄弟竝爲列郡雄長一州偏在萬里威尊無上出入鳴鐘磬備具威儀笳簫鼓吹車馬滿道胡人夾轂焚燒香者常有數十妻妾乘輜軿子弟從兵騎當時貴重震服百蠻尉佗不足踰也武先病沒朱符死後漢遣張津爲交州刺史津後又爲其將區景所殺而荊州牧劉表遣零陵賴恭代津是時蒼梧太守史璜死表又遣吳巨代之與恭俱至漢聞

張津死賜變璽書曰交州絕域南帶江海上恩不宣下義墜  
隔知逆賊劉表又遣賴恭闕看南土今以變爲綏南中郎將  
董督七郡領交阯太守如故後變遣吏張雲奉貢詣京都是  
時天下喪亂道路斷絕而變不廢貢職特復下詔拜安遠將  
軍封龍度亭侯後巨與恭相失舉兵逐恭恭走還零陵建安  
十五年孫權遣步騭爲交州刺史騭到變率兄弟奉承節度  
而吳巨懷異心騭斬之權加變爲左將軍建安末年變遣子  
獻入質權以爲武昌太守變壹諸子在南者皆拜中郎將變  
又誘導益州豪姓雍閭等率郡人民使遙東附權益嘉之遷  
衛將軍封龍編侯弟壹偏將軍都鄉侯變每遣使詣權致雜  
香細葛輒以千數明珠大貝琉璃翡翠瑋犀象之珍奇物  
異果蕉邪龍眼之屬無歲不至壹時貢馬凡數百匹權輒爲

書厚加寵錫以答慰之變在郡四十餘歲黃武五年年九十卒權以交阯縣遠乃分合浦以北爲廣州呂岱爲刺史交阯以南爲交州戴良爲刺史又遣陳時代變爲交阯太守岱留南海良與時俱前行到合浦而變子徽自署交阯太守發宗兵拒良良留合浦交阯桓鄰變舉吏也叩頭諫徽使迎良徽怒笞殺鄰鄰兄泊子發又合宗兵擊徽徽閉門城守治等攻之數月不能下乃約和親各罷兵還而呂岱被詔誅徽自廣州將兵晝夜馳入過合浦與良俱前壹子中郎將匡與岱有舊岱署匡師友從事先移書交阯告諭禍福又遣匡見徽說令服罪雖失郡守保無他憂岱尋匡後至徽兄祇弟幹頌等六人肉袒奉迎岱謝令復服前至郡下明旦早施帳幔請徽兄弟以次入賓客滿座岱起擁節讀詔書數徽罪過左右因

反縛以出卽首伏誅傳首至武昌壹黼匡後出權原其罪及  
燮質子厥皆免爲庶人數歲壹黼坐法誅厥病卒無子妻寡  
居詔在所月給俸米賜錢四十萬

吳書本傳

按封川縣本廣信地故陳元士燮舊志皆以爲封川

人物也

阮通志

### 南齊

張岳字彥高封川人少爲鄉曲所譽舉秀才初仕晉興令有  
吏幹累遷安昌郡守事齊明帝於藩邸轉西中郎帝以宣城  
王入輔用岳爲左將軍甚見寵信王卽位是爲明帝建武初  
以平寇功代陳顯達爲司空貴極台司謙恭禮下嘗建言清  
理獄訟帝從其言及蕭詵等獲罪岳見帝踈忌骨肉諷諫不  
從乃求出刺郢州卽拜驃騎大將軍郢州刺史仍加司空岳

遂棄官入長沙溫泉山人因號此山爲司空山

縣志

唐

何如瑛新州人

今新縣

五世祖言據有溪洞爲雲浮鎮將父遊

秦頗讀書知大義覺其兄遊魯有異志卽棄產貲與妻子客

寓合浦爲採珠徒長如瑛失怙能自樹立讀兵書善騎射從

江右觀察使李勉爲折衝都尉以平盜功遷左威衛將軍充

桂州防遏使太一之亂賈勇先登擒其裨將嶺表遂平及楊

慎微代勉節度嶺南或言如瑛與羅州首領馮季康入廣州

時多匿寶貨遂執之搜其家得珠琲乃父遊秦所遺也與季

康皆死觀察使徐浩爲二人訟寃代宗下詔褒贈厚恤其家

初如瑛在鄱陽遇貧士陶洪悅其文詞每賙給之至是掌浩

書記知如瑛素輕財好義軍中所獲金帛輒頒士卒道逢老



碑必有賜予因是知其必不苟取浩遂力爲申雪云

黃通志

按黃通志云據唐書冊府元龜叅修然新舊書無何如瑛事冊府元龜載此事于大厯二年宣慰嶺南莫藏用制勅中但言如瑛冤抑所謂太一之亂者事見李勉傳勉除江西觀察使賊帥陳莊連陷江西州縣偏將呂太一武日昇相繼背叛乃江右事曷云嶺表遂平耶然言之鑿鑿必有所本姑存以俟考

阮通志

陳頴德慶州人少讀書秉義明練孫吳通達權變隋末馮盎調兵端溪頴率眾赴之事平拜瀧州刺史撫循有方聽訟必集耆老咨詢再三而後決遠近稱服後盜歸唐頴亦至長安與燕賚厯勤白二州諭僦輸租賦違令者以金贖罪輯綏功多進奮武將軍卒

黃通志

鄉人卽其所居立祠祀之扁曰興

化數通志

李謹微康州人

今德慶

天祐元年進士授番禺令之任夜泊三

洲時夜半月高作歌朗吟有一漁父拏舟而來長揖曰適聞

子吟嘯有觀國之志偶就子言會世將亂矣宜高尙雲林以

保天年言訖不見謹微悟遂隱不仕

阮通志

莫宣卿字仲節封川人父讓仁博學能文

吳志

有隱德早世母

梁氏改適開建莫及芝及芝故有子二曰儔曰羣皆長於宣

卿儔羣讀書宣卿常在側聞言卽悟

白鶴儒文

數歲與諸兒戲沙

中自詠曰我本南山鳳豈同凡鳥羣人大奇之比長構書屋

麒麟山下奮志誦習才藻宏麗頃刻千萬言

封川志本傳

大中五

年廷對第一初典翰林因母老乞補外以便就養詔可賜官

台州別駕歸省迎母未至官所而卒咸通九年封川刺史李

邦昌上其事欽奉上勅爲唐正奏狀元莫孝肅公祀以廟食  
表其里居曰文德蠲其賦稅以供烝嘗著爲令誥曰朕爲崇  
德報功帝王之盛事旌淑別慝治道之當然惟茲狀元莫宣  
卿勅爲唐正奏狀元孝肅時其祭祀別爲常典表其宅里賜  
額如前推朕賞延於世之意蠲其本支租稅之供原貢公家  
之田賦充爲廟祀之烝嘗爾凡有司仰體朕意嗚呼孔子之  
道周公之孝賴以先傳經天之學緯地之文咨汝後啟尙冀  
精爽贊我皇猷汝惟欽哉母替朕命宣卿自幼以至登第所  
撰詞賦詩歌如真金美玉不落形迹如化工生物不事粧點  
雖鄉曲童子與夫田野愚夫婦皆重其名而樂道之白鴻儒文廣  
南大魁天下自宣卿始至今讀書堂片玉亭狀元井狀元書  
院龍吟水皆其遺迹云雙槐歲抄族人休符受知鄭愚爲融州刺

史權知泰州著有桂林風土記

吳志

按宣卿隨母改適事載 欽定全唐文白鴻儒莫孝

肅公詩集序鴻玷官封州序爲宣卿嫡孫莫立之請  
作斷無可疑而阮通志謂此事爲齊東野人之語豈  
全唐文不足信耶倘謂隨母改適足爲宣卿玷故隱  
之而范仲淹亦隨母適長白山朱氏其舉進士時猶  
名朱說未聞足爲仲淹玷於宣卿又何嫌焉

陳萬言封川人乾符二年登進士爲歙州刺史周恤民急能  
折豪強時稱能吏晚歸隱漁村乃刻苦作詩人稱慕之

戴通志

王國材封川人昭宗乾寧三年進士不任而歸家居清苦供

母篤孝

南漢

陸光圖四會人祖東昇爲劉隱裨將守端州及龔建國累遷兵部侍郎父昂桂州刺史靜江軍節度使光圖生長華胄讀書知大義仕至閤門副使劉鋹時文武百官多入知內侍省光圖堅求外郡遂出爲郴州刺史鋹昏愚以郴爲極邊惡地故徙任之光圖至郴周恤窮民招輯兵事境賴以安民呼陸父大寶十三年宋師來伐光圖遣兵柵騎田嶺會雨漲黃溪水溢宋將潘美至順流破其柵遂取郴州光圖與大將暨彥贊力戰被執不屈死鋹遂亡國其子孫多居端州

黃通志

按光圖有故吏龐姓者嘗奏事見鋹鋹識之及降於潘美過騎田嶺龐來迎鋹驚曰爾亦在此耶對曰大王之國邊境至此而極非有萬里之遠也鋹初以郴爲極邊故使光圖居之不知其在中國特彈丸黑

子耳

通鑑綱目

宋

梁頽字微之其先京兆萬年人祖炅佐幕番禺時劉氏稱漢炅恥非王命遜於東莞宋初遂占籍高要戴通志頽秉奇節篤行信於朋友詞章尤贍補武仙簿歷鬱林尉封州司戶叅軍悉著能聲年及掛冠移疾乞休朝廷美之遷光祿寺丞景祐元年終於封水年七十三子揆事親孝築廬塚旁朝夕哭泣廬外植蔬樹栗以給餽粥不茹暈血凡六年耆老以狀白長吏表聞詔郡縣以時存問賜粟帛旌其孝掌選補者以揆至行官之

余靖撰墓誌銘

梁弼直高要人通五經博學強記五魁鄉舉號爲梁書櫃秘書張宋卿守端州延之齋閣甚禮重之調靜江荔浦尉以除

盜功轉鬱林僉書一日假寐夢西海府君牒請至殿庭如王  
居講賓主禮請撰水城記梁援筆立成覺而錄之明日無病  
而逝其遺文尙有能誦者戴通志

綦母慮字深之高要人紹興五年領鄉薦歷官淮南江浙荆  
湖路發運司計置官宣和五年轉廣東西路提舉茶鹽事再  
除轉運判官先是朝廷以廣惠潮恩四郡鹽課屬之轉運副  
使鹽戶失業逃亡虧損元豐中舊額十二慮被命奏鹽戶  
典賣鹽田於稅戶得享厚利而鹽田歲額有虧乞命稅戶買  
町戶鹽田依原竈眼送納朝廷是其議命下行之町戶不爲  
豪民侵併實自慮始同上

羅隱孫字宗棟寶祐丙辰進士居高要之羅岸性聰慧有大  
志讀書洞達世務先是羅岸地勢瀕江水無堤岸孫每爲商

畧輒撫髀歎曰有志未逮耳及登進士授徽州僉判尋轉浙江運使所在多惠政籍籍有聲朝廷降璽書褒之未幾解組歸捐俸築堤二千餘丈高丈餘捍田六千餘頃繼又開墩埔小陌二寶旱則引水灌焉羅岸土田腴美得不困於公賦隱孫之力也

吳志

李士廉字舉之四會人形狀魁碩有大志喜周遊四方尤愛蜀之勝因寓於錦城輕財好施蜀人敬之熙寧二年河隴用兵諸將經費不節朝廷遣御史按察下總管使王君萬於獄君萬素不識士廉望風遣人求救士廉知君萬驍將也出錢二千緡與之免罪既出獄適鬼章犯洮隴君萬力戰屢克敵每於所獲功爲士廉報士廉曰吾豈望報者大果祐吾有子力學獲祿養足矣君萬感泣後子積中登進士第士廉從積



中宰新吳時廉訪委鞠獄陰使中傷之又令增羨鹽許以薦章士廉戒之曰吾固願汝顯榮必以是得之弗願也積中從

父訓弗許後以積中貴封翰林學士

黃通志

李積中士廉子元豐二年進士卓然有台輔器歷官御史翰林直學士司馬溫公作相時積中嘗與議新法不阿後蔡京得政黜元祐之黨凡二百九十人積中在黨中舊居四會之社山後以黨籍遂家豫章世仕於朝衛尉丞良弼戶部侍郎安國兵部尚書大性省元大異大東皆其子孫並躋侍從爲世名臣父子皆祀鄉賢

戴通志

李大性字伯和四會人少力學尤習本朝典故以父任入官因忝選進藝祖廟謨百篇及公私利害百疏又言元豐制六察許言事章惇爲相始禁之乞復舊制以廣言路從臣力薦

之命赴都堂審察僅遷一秩爲湖北提刑司幹官未幾入爲  
主管吏部架閣文字丁母艱服闋進典故辯疑百篇皆本朝  
故實網羅百家野史訂以日歷實錄核其正舛率有依據孝  
宗讀而褒嘉之擢大理寺直遷勅令所冊定官添差通判楚  
州郡守吳曦與都統劉超議欲移城他所大性謂楚城實晉  
義熙間所築最堅厚奈何以脆薄易堅厚乎持不可臺臣將  
劾其阻撓會從官送北客朝命因俾廉訪具以實聞遂罷戎  
帥召大性除大府寺丞遷太宗正丞兼倉部郎尋改工部陳  
傅良以言事去彭龜年黃度楊芳相繼去大性抗疏言朝廷  
清明乃使言者無故而去所甚惜也數人之心皆本愛君任  
其去而不顧恐端人正士去者將不止此孟子曰不信仁賢  
則國空虛臣所以爲之寒心也孝宗崩光宗疾未能執喪大

性復上疏言今日之事顛倒舛逆況金使祭奠當引見於北宮素帷不知是時猶可以不出乎檀弓曰成人有兄死而不喪者聞子臯將爲成宰遂爲衰成人曰兄則死而子臯爲之衰非爲兄也若陛下必待使來然後執喪則恐貽譏中外豈特如成人而已哉遷軍器少監權司封郎提舉浙東常平改浙東提刑兼知慶元府召爲吏部郎中四遷爲司農卿明年兼戶部侍郎出知紹興府甫一歲召爲戶部侍郎陞尙書朝論將用兵大性條陳利害主不宜輕舉之說忤韓侂冑出知平江移知福州又移知江陵充荆湖制置使江陵當用兵後殘燬饑饉繼以疾疫大性首議賑貸凡三十八萬緡有奇前官虛羨凡十四萬五千緡率蠲放不督民流移新復業者奏免徵權邊郡武爵本以勵士冒濫滋衆効兩路戎司冒受逃

亡付身凡三千四百九十有七道繳上毀之左選爲之一清  
江陵舊使銅鏹錢重楮輕民持資入市有終日不得一錢者  
大性奏乞依襄郢例通用鐵錢於是錢貨通流民始復業除  
刑部尙書兼詳定勅令尋遷兵部時金國分裂不能自存有  
舉北伐之議者大性上疏以和戰之說未定乞令朝臣集議  
從之尋以端明殿學士知平江府引疾丐祠卒於家年七十  
七贈開府儀同三司諡文惠宋本

韋君載字元厚春州人

今陽春縣

質穎向學聞廣州多名儒乃往

從師擇友學成而歸登淳熙二年進士以奉議郎權攝廣南  
東路提舉茶鹽奏減官賣鹽及增收鹽斤錢商民便之今祀  
於鄉賢黃通志

曾躍鱗字子龍陽江人少警敏善屬文淳熙五年登進士第

初爲羅源簿以弭盜功擢判汀州所至皆有政聲受知於學士李彥穎薦入秘書時少師陳俊卿器重之會諫官缺俊卿以其名上遂拜監察御史紹興末災異數見鱗疏請避殿減膳以承天心啟事剴切多見施行

吳志

陳嘉猷南恩州人紹興二年以詞賦舉於鄉任高州府推官政績卓異擢知新州事歷朝議大夫秘書省校書郎先是任高州時二親垂白便道稱觴邑人嘉其榮立介福坊以表之今坊圯而里巷猶傳其名

同上

梁作心南恩州人力學窮經累舉於鄉紹興間肇慶通判黃公度攝守南恩大稱重之是歲作心領鄉薦上春官得特奏名與廷對登第南恩士人得雋者自作心始青矜知稽古之榮梓里見破荒之事公度答作心啟也明嘉靖中知縣吳煥

章表而祀之

舊陽江志又見恩平志

林觀南恩州人紹興三十年海賊陳演添等掠高雷境上觀爲所執旣而殺演添及其黨九十餘人歸南恩州補承信郎

輿地紀勝

李英字子厚高要人天聖中同學究出身初任象州司理秦軍轉博羅簿用辟薦厯橫州白州欽州推官所至以廉能稱熙寧中欽州守臣寡謀啟釁交人攻城陷之英以死守一家殲于刃者十有三人

明統志云懷寇之難

神宗聞而悼之贈比部郎中

詔錄其季子忠爲班行從弟表爲三班忠乃招魂葬之於祿

村建祠祀之號比部廟祀鄉賢

黃通志

按一統志郡志書英高要人廟食高要時高明未分縣地屬高要故也今本縣布社都坑頭村見有英宅

遺址高明志

梁順孫字景樞高要人今屬高明以兩貢辟雍元豐間賜廷對將仕郎出身歷陽江尉廣州左司理興寧新會令桂州觀察判官宣和間監邕州橫山田州謹乃寧畢等峒金坑舊制輸金監官多有所需峒丁苦之叛服靡常屢為朝廷患先時儂寇陸梁掠平民入峒凡數十年無一人還者梁至撫諸峒以恩信不較其金惟從其便諸酋長悉聽服梁遂以身請歸其民民之從而歸者如市州人德之有梁父母之稱廣西良續錄未幾卒於官喪發之日民護送者數百里祀名宦祠以狀聞於朝朝廷嘉之官其子嚴諷累官朝請郎知韶州次子嚴穆累贈中奉大夫其子孫累世仕宦嚴通志

按高明志曰順孫姓梁後姓嚴蓋賜姓也稽家譜云

嚴諷補廕時上問順孫狀有號令嚴明之語遂賜姓  
嚴又云舊志嚴諷累官朝請郎知韶州穆諷之弟也  
累贈中奉大夫世居高要峒原村遷居范山豸岡子  
孫累代仕宦考書山注云鄉人嚴穆肄業其上子諷  
以特奏知韶州孫挺臣以正奏通判廉州與之矛盾  
疑有錯簡又曰按高山嚴家譜云諷由特科列在郡  
志其先本姓莊後改嚴載之氏族可考也宋英宗時  
避遼夏兵火卜於古端之西雲蓋鄉都騎都書山下  
峒原居焉子穆孫挺臣以正奏通判廉州並存備考

阮通志

黃執矩字材用高要人今屬高明質樸有古風早厭科舉之  
文慕濂洛之學常從胡寅張栻遊講明正道叅訂中庸大學



之義以訓後進在南軒門嘗問喜怒哀樂之未發謂之中答曰凡涉於思皆已發也未發之中豈容安排量度伊川與呂與叔論中庸最宜詳味如問致堂質諸鬼神而無疑鬼神如何可質答曰知鬼神之情狀則可見有質之之理又問國家興亡何以見乎蒼龜動乎四體答曰通天下一氣故如此如石勒耳鳴皆成笙簫聲隋煬帝晚年夜常恐懼不眠之類初調封川尉轉新興丞以俸資嫁姪女鄉人稱其義祀鄉賢祠

戴通志

譚惟寅字子欽高要人今屬高明紹興二年登進士第讀書一覽終身不忘常夜入衢州詳符寺閱古碑就僧假燭不至遂以手摸之歸卽錄所記黎明對本不遺一字應博學宏詞科叅政龔茂良薦除太學博士出倅靜江容州提舉廣西鹽

鐵事

戴通志

建思賢堂祀元次山等五賢倣其行事又於堂之

東西作延老樂山二軒以見志

廣西志續錄

尋遷廣東提刑改江

西提刑卒於官端州人祀鄉賢有蛻齋講學大學中庸行於

世

戴通志

陳元輔陳英輔鶴山人共祖珠仕高宗拜諫議大夫守正不

阿自汴梁謫宦南雄遷邑之凌村帝時駐蹕厓山元輔兄弟

仗義勤王出粟數千石助師特自建義士坊於其里元輔卒

遺戒子孫不仕元其裔孫經綸輩至明始顯

縣志

石處道字元嬰康州人

今德慶

幼聰敏築室讀書鄉人因其所

居之村山水皆名書堂登元豐五年進士知松江縣以清白

稱政暇爲詩詞有松江集官至朝奉郎祀鄉賢祠

金通志

李熙載字伯先康州人幼穎悟博學能文元豐八年進士元

符間爲廣南西路計度轉運使政聲著聞賜勅褒嘉官至朝

議大夫有詩集行于世今祀鄉賢

同上

樂夔字友龍德慶州人

戴志作字文龍端溪人

舉廷對調鬱林司戶遷

封川令調循州長樂令有寇千餘恣剽掠邑無城可恃夔集民兵激以重賞一鼓成擒大帥留泰目爲健令漕吏劉強學聯署上聞班見改宣教郎未幾轉通直郎賜緋魚袋居官以廉能著攝倖董試奉直總餉歲糴二十萬價視昔適歲稔粢直頓減羨錙一千五百萬吏欲私之夔悉還農士民感歎卒

祀鄉賢

黃通志

伍士階晉康人

今德慶州

官累奉議郎知封川秩滿掛冠東歸性

耽元寂自適其志子孫俱以忠孝顯運使同鄉李伯先贈詩有一門萃忠孝竹帛寫家聲之句祀封川名宦

同上

梁夢奇晉康人

今德慶州

世有義方累舉調潯州法曹廉謹自守

繡衣使者行部風力甚勁守以下皆獲譴見夢奇獨優禮之  
薦諸朝遷瓊州推官年六十致仕築室茂林修竹間集鄉俊  
課試之郡缺博士委攝焉郡守下車必先訪其廬其推重如

此

吳志

陳謙德慶州人少讀易以學行聞鄉選士屢充貢後中特科  
仕有能聲歷韶潮二州叅軍監司廉其有守屢旌之官至通  
直郎

謝文晏德慶州人性穎悟成誦卽不忘登紹熙四年進士初  
知武城縣詢民疾苦興利除害董修城垣盡心區畫邑人立  
碑誦之後官殿中侍御史冰操益勵在朝多所建白俱同上  
謝復生德慶州人登清祐進士初任華州監獄陞大理寺評

事授誥命二道休致杜門訓子慷慨樂施嘗貸友人李檄粟五十斛不問其值救佃獐黃公韋等三十命却其酬里閭賢之

州志

談文炳字榮甫德慶州人少博學景定五年進士歷官果化州判廣西宣慰使司保陞萬承軍民州同撫綏流移訟簡民安以薦陞思明府同知兵亂遂避於丹崗村居焉

同上

梁畿德慶州人咸淳三年及第官至朝列大夫終於任諭葬本鄉羅旁九牛山誥封猶存

州志

莫天祐字均作封川人奮身白屋勵志讀書宋嘉定間進士及第任連州司法叅軍改知道州寧遠縣子姪一門俱領鄉薦邦人榮之

戴通志

元

梁國傑陽春縣人有才畧兩任隣封不私故舊累官昭勇大將軍沿海招討使號令嚴明士卒用命海寇遁跡聞於朝官其子奎安陸州吏目遷奉訓大夫知南恩州轉朝列大夫黃通志

李梅國字敦臨陽江縣人祖餘慶任南恩倉大使大德四年登進士第三人授給事中陞通議大夫吏部左侍郎進資政大夫刑部尙書大定四年卒有詩名其子仲高以恩補官曾孫彥信至正三年爲刑部員外郎舊陽江志

劉青其先亳州人建炎初隨高宗南渡寓信安遷居端州龍津坊父經仕元以武功授武經大夫廕青汀州都監歿於主事贈武翼郎子椿年承襲授廣東市舶監庫轉德慶都監合高要調陽江轉新州同知黃通志元英宗至治元年勅葬於良

村都岳塘山椿年子貞卿因家焉舊高明志吳志作高要

梁全字伯謙德慶州人其先河南杞縣人宋南渡時父宦遊

至晉康因家焉全好學通禮記有文武才任本路同知為政

以厚風俗興教化為本郡屢為西寇所擾全乃諭民為防禦

策自是歲免刦奪調向武州同知未幾遷太平路同知封敦

武校尉黃通志子俊傑舉文學授承務郎海豐縣令今祀鄉賢

德慶志

按戴黃郭三通志云梁全延祐間膺薦舉德慶州志

云至正甲午鄉薦乙未副榜考延祐則元仁宗年號

至正則元順帝年號未知孰是阮通志

郭友德慶州人授大中大夫本路總管始領郡事救災恤民

久於任興革協宜惠澤及人郡之父老悉能頌之今祀本州

名宦祠同邑戴元字貞甫至正間以鄉貢授封川判官立心

嚴謹撫字有方亦良吏云

戴通志

梁仕亨德慶州人以身幹武畧授沙村巡檢時流賊劫悅城

鄉仕亨統率兵夫躬爲捍禦人賴以安

吳志

李逢邱開建一都人學優行飭英偉不羣元至正二年以文

學舉歷任江西行省肅政廉訪司副使振綱肅紀風裁凜然

大德元年致仕

開建志

明上

梁敏字以訥高要人父至孫有善行任元爲新州同知敏性

孝友穎悟能文年十九舉洪武壬子鄉薦歷清遠教諭繁昌

宛平丞以文學薦擢左春坊左贊善常被命作午門觀燈詩

及賦朝陽鳴鳳圖操筆立就中年喪偶不再娶自奉如寒儒



以勤儉訓諸子多所著詠年九十六卒有雲萍集

黃通志

梁祖榮高要人洪武中充貢爲國子生授武緣知縣憂去永樂中改知柘城縣值霖雨彌月教民疏濬澮溝邑無水災民有負租者貧無以償祖榮首捐俸倡之而效助者眾繇是官無負租民無失所卒於官

同上

余存諒高要人建文己卯舉人庚辰進士永樂三年容縣知縣綏流民撫獮獍時王師征交阯存諒率其部伍運糧民被其德無逃亡者

阮通志

鍾瑛字汝器高要人修眉豐頰沉默莊重事親孝年十一遊郡庠子史百家靡不該洽永樂辛卯登進士時文帝有事四方選文行優者入秘閣習四譯文字瑛與選爲翰林庶吉士授編修馳驛歸省鄉人榮之秩滿轉大理寺正仍辦秘閣事

雖久居侍從不殊章布丁內艱哀毀成疾卒

梁軫高要人

今三水縣

少卓立有經濟永樂辛卯鄉薦授福建道

監察御史肅清風紀務持大體巡按直隸有指揮抵法餽以

金視一明珠五叱之出按湖廣清臬司匿賊劾武臣不法事

後爲忌者所中謫雲南典史

並黃通志

葉貞字夢吉高要人少有大志由宣德乙卯鄉薦歷潯州鳳

陽慶遠同知居官廉介毅然以民事自任天順三年賊寇慶

遠圍旗山貞督兵赴之賊不戰而潰後兩日賊合衆攻鷄刺

等寨報至而都指揮黃鉞與知府黃振方酣飲弗顧貞嘆曰

民急矣我爲父母不一援之忍乎遂拂衣上馬督東蘭那地

目兵及民兵往援抵柳青鋪遇賊力戰賊密識貞攢戈刺之

貞猶手刃一首子公榮從子官慶民兵璩用和等三百人皆

死是夜雷電風雨大作雪深尺許賊大驚解圍去提督都御史以聞制曰蘇緘擊智高於邕管偕子孫以捐軀馬暨挫海牙於靜江胥將士而殞命貞之壯節奚讓古人贈朝列大夫廣西布政使司右叅議民立祠祀之顏曰忠義有嘉忠錄

明史

本傳

何經字子常高要人領鄉薦任河東運判廉而惠遷順天府

治中勤於職業權河西務清譽益著考廉吏第一

載通志

陳宣字汝爲高要人領鄉薦授直隸江陰教諭秩滿當遷詣銓部辭民事非己所長乃改靈璧教諭與江浦莊景往來最爲所重主考江西薦欽順首解咸服其藻鑑友人番禺崔廷珪按江西有僧犯姦賂宣求爲脫罪叱却之其介如此有

集藏於家

同上

謝永安高要人正統七年捐穀一千石備賑奉敕旌義民勞以羊酒仍免木戶雜派差役又捐資開渠通水利永滋灌溉

吳志

李顯字炳文高要人領正統辛酉鄉薦授武學訓導時武學新設慎簡師儒而顯與焉訓迪有方咸知向學教諭安仁時諸生未有以科第顯者程課責成卒顯劉烜咸登進士外艱服闋補邯鄲教諭當考績諸生赴京懇留吏部最選監察御史辭疾不赴遷南昌府學教授教如安仁未幾辭歸卒年七十九卒顯適以叅政分守嶺西誌其墓

戴通志

梁致南字遂初高要人通五經志行高潔以鄉薦歷紹興建昌訓導六典文衡致仕家居嘗修郡志天順二年流賊掠蓮塘致南年已九十六被執賊令講書厲聲罵曰蠻奴若曉禮

義必不爲此賊不忍害以竹輿舁之行致育知不免語舁者  
曰至逕口深淵卽白我遂投江死賊驚嘆而去有竹屏稿藏  
於家子穉應浙江鄉薦穉子瑜瑜子鏞皆舉於鄉知來賓遠  
安二縣有政聲鏞廉靜剛方篤於人倫仕至鎮江府同知吳志  
李魁字士元高要人登成化進士由禮部郎中出爲江西叅  
議正版籍平賦稅簡卒徒虔南盜賊以息爲忌者所中歸通志

程文字貫道高要人通春秋績學不倦登進士授南京禮部  
主事清慎著聲遷儀制郎中丁外艱杜門謝客絕跡公庭服  
除赴部冢宰王恕素重其才欲留用爲忌者所沮補南工部  
行次高郵卒餘干張吉銘其墓吳志

吳尙質字叔華梁伯鴻字仲毛俱高要人叔華才思俊逸學

問該博嘗擬解首主司競落時論惜之以歲貢授戈陽訓導  
伯鴻亦歲貢訓導温州解官歸徜徉山水吟咏自適陳公甫  
嘗寄伯鴻詩明朝擬泛羅浮棹且向西風訪楫師其推重如  
此吳有解雲集梁有浮山集二子齊名

吳志

李實字叔大高要人博極羣書舉宏治甲子鄉試三上春官  
不第遂怡情山水四十年如一日惟與同邑梁玠往還玠字  
宗余亦以歲貢卒業成均隱居不仕結廬郊墅飲酒賦詩老  
而不倦大學士方獻夫署吏部事嘗過郡士大夫咸出謁執  
二人手曰二公高尚非吏部所能屈也坐以上客年皆八十

黃通志

李一龍字體乾高要人性孝友善事祖父繼母撫其幼弟族  
黨稱之領鄉薦授石城教諭棗陽令以興學均徭省刑恤孤

爲務置義塚塞金穴毀淫祠崇祀典政績茂著居六年改令  
宜城比歸立祀田婚嫁諸姪日與士大夫結社詠詩所著有  
益吟稿

吳志

潘節字時中高要人宏治中舉於鄉性孝友持身方正家食  
時不私謁郡庭歷融縣教諭桂林教授南太學助教卻修餽  
勤職業祭酒魯鐸薦之銓部將授憲職以不屈權貴止授永  
州府通判進同知爲政寬仁明斷上下敬愛會屬邑兵亂僚  
佐懼節誓死獨往勞瘁成疾臨終對客議政毫不及私家無  
餘蓄太守黃焯誄曰克勤克敏始終耿耿及擬祀典狀曰師  
道尊嚴家聲清白今祀鄉賢子庭榮以貢授宣平教諭庭南  
鄉試第二授登州守革歲例二千餘金置學田修州邑志居

官可紀

同上

吳赴字允升高要人尙質之子爲人醇謹由鄉薦知武宣縣有惠政遷太平府判同知思恩府時土目岑濬爲亂畫策遏禦民賴以安又請命於朝蠲租五百餘石民甚德之入爲南京工部員外郎進郎中乞休加光祿寺少卿致仕鄉居恂恂分產以贍諸姪進朝列大夫

郭通志

陳輅字以載高要人儀幹魁梧志氣慷慨以舉人授袁州府推官平讞執法人不敢干以私南贛都御史王守仁執宸濠獻俘行在輅與有勞焉爲忌者所中罷歸居鄉恂恂至今學者稱其純德年七十有五子修以歲貢任沭陽知縣

吳志

謝宗孔高要人正德丙子科鄉薦任藤縣教諭陞國子監助教轉陞贛州府理刑有惠政奉旨考清廉第二人陞處州府理刑陞大巡

同上



麥孟陽字汝復高要人性醇謹舉正德鄉試助教國學至石

阡知府有政聲三年乞休屏迹郊園彈碁賦詩壽八十

縣志

鄧崇德字子修高要人慷慨有氣節由鄉薦授沙縣知縣俗

狡難治崇德以德化之作十事諭民決疑獄活一家死罪者

三民稱神明未幾卒士民聚哭如喪父母

同上

姚仲韶字以高高要人穎敏十歲補弟子員舉嘉靖壬午鄉

試居常修謹取與不苟初任永安知縣廉公有爲盜賊屏息

邑無冤民卒於官士民慕之有屏桐遺稿

吳志

羅一中號元山高要人弱冠從湛文簡遊益潛心理學嘉靖

辛卯登賢書出宰江西樂安縣轉湖廣石門縣居官以慈惠

爲本凡讞獄必焚香告天有羅重辟者輒求其生至不得已

抵法情甚惻然居家孝友一日曾客有小婢負一兒趨過卽

肅然起立詢之乃其叔也合族宗祠告成文簡書禮義宗祠四字以贈厯官所餘俸悉均分族黨或勸爲子孫計曰吾書史滿案卽所以遺子孫何必阿堵物耶嘗築一軒與子姪生徒聚講性學卒年七十有四以子欽顏誥贈儒林郎光祿寺署正著有躬行日省錄及元山集五十卷爲文簡所賞黃通志陳九成字子韶高要人舉嘉靖庚子鄉試教諭英山轉應天府學教授國子助教召拜山西道監察御史出案甘肅罷歸居家儉素未嘗以非道干人嘗修郡志吳志

區廷芳字士傑高要人善事繼母嘉靖初魏校督學嶺南檄諸生有行者講學五羊書院於城之八隅各置館焉選館師而廷芳師北隅教童子修小學之節是時奸人抵欺因而爲市及魏奔喪歸粵中大譁廷芳教北隅如式不及於禍至歐

陽鐸來督學乃檄還主濂溪書院晚膺歲貢其子文科同以是年貢於開建廷芳爲永豐訓導羅城教諭十餘年不增尺寸食舊而已初校問廷芳何爲對曰畏慎益其素志也次子肇慶亦以貢教諭番禺能守其庭訓焉

郭通志

鍾大咸字元聲高要人少端好雖爲童子時方領矩步雍雍如也早孤力學淹貫經史年十四補郡庠隆慶己巳恩貢中萬厯癸酉經魁性孝友撫諸弟成立爲營室產初授安吉州平賦均役禮士愛民會歲祲寬徵蠲賑全活甚衆調橫州橫俗多置親不葬爲窆不克舉者諸豪家遂爭營地俗爲之變晉貳蒼梧郡丁內艱起補福州遇訟獄必令詣案前從容鞫問以此情無不得法稱明允出汎梅花不受兵餽士卒悅服病濕致政行李蕭然士民思之請祀名宦辛巳行弓田法周

令欲約弓足畝咸力勸受制於錢曰錢今制也原注此處疑有闕文籍遵制紂畝額爲之矣矧必無紂也周令用其言比事竣閩邑稱平他邑皆莫之及至於開鑿北港寶穴任勞怨豁虛糧咸力居多同上

謝明德字明之高要人嘉靖辛卯舉人知平和除苛令議販貨禁服毒捕宿惡詔安白葉峒自正德時憑險負固明德上狀請討之檄暮下而朝誓師分道深入賊皆驚潰擒陳劉二酋及餘黨數百人覆其穴漳汀潮贛四郡歡呼相慶督撫薦之遷潮州福建通志

按各舊志及明本鄉試題名嘉靖辛卯並無明德名通志既采人姑存之以俟考

阮金字南重高要人由歲貢任平樂訓導嘗署修仁荔浦縣

事修志購書增文廟祭器遷長寧教諭歸居鄉循禮鄉射東序每賓之

黃通志

黃虞龍廣東高要人天啟甲子解元崇正庚子特賜進士知清平縣時值苗亂內撫字而外禦侮備極苦心後擢黃平州牧土賊藍二攻陷州城死

阮通志

梁廷芳高要人萬厯癸卯鄉舉令旌德清廉有保障勞以直忤歸建塔寺掩遺骸代死友償逋課耕教子屏迹城市

吳志

羅成功字惟一高要人萬厯癸卯鄉薦謁選得永平推官時兵餉叢雜成功綜覈廉平三輔倚以爲重秩滿遷興化同知督師留之崇正己巳城陷冠帶縊於署中盧龍令鄧紹禹以聞贈光祿寺丞

同上

李廷材字柱可高要人居家孝友負奇節樂周親友困急文

行早著萬厯癸丑成進士令如皋乙卯大飢多所存活掩骼  
骼千計清丈新漲沙數百頃抵補漕糧以強項調涓川未任

卒如皋有遺愛碑

郭通志

李初榮高要人萬厯鄉薦令義烏持已廉明待民仁恕捐俸  
資給諸生膏火以忤權貴罷歸絕迹公庭結社南濠談藝不  
輟有家訓顏甲集以貽子孫族屬皆興禮義祀鄉賢祠

吳志

孝子黃煥高要人祀孝弟祠里居事實無考

陸達人四會人光圖九世孫性謹厚行陰德明初時軍旅饑  
僅人死不得棺生不得食者纍纍載道達人罄資棺之食之  
一時盡謂之達人達人亦因以自命云世居邑金雞山下因  
取其地爲城塹以楸櫨廢倉基償之遂爲楸櫨都人

林用章四會人元末隨父炯由綏城銀岡徙居上林砥行好

修洪武間以明經授邑訓導聲聞日著應詔上書大要在推誠以安親藩業具藁疾作不果行知縣梁潛閱其書韙之惜不究其用上俱同上

劉德其先真定人祖宦遊嶺表家於四會稟性剛直勇健善戰洪武初兵至德往見征南將軍廖永忠遂薦之於朝授陝西鞏昌府通判陞臨洮府同知湖廣襄陽府知府福建都轉運使洪武十三年引年卒於家阮通志

陳迪字保中四會人博學能文篤於孝友登洪武乙丑進士任陵江縣丞有政聲坐事謫戍遼左以明經薦爲國子助教仁宗在東宮時召入文淵閣同修永樂大典居館職十餘年有詩文類集藏於家戴通志

呂斯美字道先四會人俊雅有直節博洽多才洪武間由人

材薦辟授兵科給事中遇事敢言行事亦多卓犖云

黃通志

盧剛字柔濟四會人洪武二十五年貢入太學歷官岳州守  
嘗誦范文正先憂後樂語一意憂民不爲私圖勵精勤政興  
利除害百姓德之致官家居恂恂不立崖岸鄉人至今稱誦  
之

吳志

林賁字光輔四會人永樂乙未進士授陝西道監察御史在  
任十餘年歷按三省嚴毅執法不少徇人持服家居族姻私  
托悉拒之服闋之藩司請牒藩臬將祖餞卽夜解舟去明日  
追饋竟不受其清操如此弟全永樂甲辰進士性剛直有藻  
鑑與賁齊名

黃通志

林全字光道永樂甲辰進士授吏部文選司主事性剛直有  
藻鑑常與家宰酌議選士輒嘆以爲知人與兄賁同心國事



爲時所重請告家居未幾部行催促復任尋卒

吳志

劉澄字端本四會人謹樸寡言事親孝家貧力學手不釋書登進士歷官戶部郎中出守興化蔬食布衣澹如也應召卒

於途行李蕭然人比之趙成都云

戴通志

李宗林字嗣茂四會社山都人幼值兵亂奉母賴氏遷徙不常而晨昏定省問寢視膳曾不少輟舉永樂戊子鄉薦任交州府利仁縣令育士愛民興廢祛弊多有美政惠澤及人人咸戴之以病歸百姓泣留刻石頌德垂橐歸家片楮不入公門性好詩文勤著述吟咏自適而排難解紛仗義務施尤爲里中所倚重年七十四卒於家

同上

鄭彤字子敬四會貞山都人性剛方貧而有守領永樂鄉薦以文學入對授吏科給事中疏劾李賢隱伏事忤執政罷去

杜門謝事衣食不給處之裕如子錫景泰鄉薦仕廣州府同

知吳志

李道全字時行四會人由鄉薦任橫州寧州知州剛練果斷不受私謁州多武弁數挾私白事全不聽嫌之遂以事中全遷漳州郡丞未之官罷歸家居敦尚禮義手不釋卷晚而彌

篤郡通志

林世遠字思紹四會人幼孤母歐陽氏訓之博洽經史長於文詞登成化進士歷莆田蕪湖魏縣知縣所至有聲擢監察御史按滇南振風紀善處諸蠻出守蘇州剔奸祛弊平海寇修郡志皆有成績蘇通志

歐陽福四會人成化間靈山縣西鄉巡檢蠻寇掠永泰村福率民兵奮戰亡於陣巡撫以聞贈布政司照磨旌其閭曰榮

忠錄子爲柳州訓導鄉民立祠祀之

郭通志

李津字濟之四會人性剛介苦志勵行登宏治壬戌進士知  
寧海州時劇賊劉七等流劫本境津乘夜遣卒四出發砲張  
疑兵以懼之賊遂引去陞南京刑部員外郎進郎中歷守南  
寧鄖陽興學救荒俱有成績陞兩淮都運使時鹽筴叢委奸  
蠹根據挾剔釐正一裁以法國課倍昔而羨餘悉歸於公爲  
權貴所忌罷歸南海吳允貞亦以廉介稱每自誦曰得無愧  
吾鄉濟之否其爲人所敬服如此生平淡薄片楮不進公門  
年七十卒於家

黃通志

簡篤敬四會人智勇過人宏治間馬山羣盜嘯聚猖獗陶公  
魯討平之餘黨多潛伏平甕山募有能往招降者敬應募以  
已降渠魁四人抵賊巢穴陳說利害衆盡出降

同上

李槩字時勵四會人嘉靖乙未進士授德清知縣政事精明民畏服召拜南京山東道監察御史父喪歸遂不起杜門謝客嘗以田租八十石入廣寧學年八十卒

郭通志

蔡文瓚四會人幼有至性捐己貲厚異母兄一無所恡兄爲吏胥所逮慷慨代白以明經授南昌訓導周恤貧士轉授武緣教諭未幾聞子希尹不與棘闈試拂衣歸督課之尹遂領嘉靖己酉鄉薦歷官南京都察院司務

吳志

梁紹唐字時雍四會人博學能文篤於孝友嘉靖間以明經授宣平縣訓導署邑篆五閱月以廉惠稱外艱服闋補永州遷義寧教諭拂衣歸築瑤溪別業老焉布衣蔬食精葩經爲後學指南時大羅山寇剽掠大爲民害唐與邑令張文光區畫措置賊因以平

同上

盧宅仁字伯居四會人登進士授都水主事管濟寧開河議  
修仲家淺諸閘底績時逆瑾擅權有所需同列曲徇宅仁獨  
不應幾蹈於禍瑾敗獲免厯雲南副使以邊功受賞轉福建  
按察使能決冤獄丁內艱服除補廣西復以父喪去時已有  
雲南右轄之命矣終喪守令勸駕宅仁嘆曰人臣之義終事  
而退且仕以祿養親今二親皆違養矣出復何爲竟不起居  
鄉恂恂鄰有犯者以理論之不悛則閉戶弗校嘗修邑志多  
所著錄

黃通志

梁素四會人文雅博學長於詩賦尤好行善嘗遇一客溺水  
挺身拔救後以事被誣坐罪遇其人得免人以爲積善之報  
嘉靖二年知縣姜良申給冠帶壽九十六

縣志

李文盛四會人與湛若水同學相友善至通顯數有所贈遺

文盛悉却不納若水益重之平居寡慾淡交不事文飾嘗客  
廣州室惟琴書危坐終日屢空弗顧得遺金訪其主還之其  
不以利傷行類如此

吳志

吳鴻達字于漸四會人隆慶庚午孝廉初授臨高教諭勤課  
恤貧委署縣印泊狀漸著陞北流令革陋規刑清政簡邑人  
德之未幾陞海州守因勞得病未至而卒

戴通志

李淦字汲之四會人嗜學慕古儉約自持爲諸生時以德行  
爲督學魏公所重命師社學舉社中有才質者俾補弟子員  
所親者以私干咸不許領歲薦司訓南安日集諸生以古道  
相飭勵月俸所入常以資寒士遷天河教諭致仕歸囊無一  
錢怡然自適

吳志

林長清字茂竹四會人爲諸生時篤學談經名士多出其門

領鄉薦第九名初授天長縣教諭陞太平縣尹廉慎自勵以  
亢直不阿改教後爲楚藩長史

陸表字朝儀四會橄欖都人以廣寧籍貢任崇義訓導安遠  
教諭性溫厚處家和睦好吟咏善大書

鄭裘字少華四會人安貧篤善誘進後學督學四旌懿行以  
歲貢任普寧訓導諸生爲立碑稱其模範

李燦日四會人居家孝友教子義方由廣寧歲貢任廣州訓  
導勤課文行正己率人

吳士耀字治南四會人清白吏鴻達之孫也性篤孝友以春  
秋領萬厯甲子鄉薦

案通志縣志俱作天啟經魁

任古田令陞工部虞衡

司主事有春秋決議尙書提覽行於世

俱同上

梁千鍾字天錫四會人以貢授新建訓導師範肅然更饒鑑

識宦粵者如李遷李遜魏良貴丁以忠皆其高足弟子也遷敘浦教諭以文行見重於上官屢徵清理郡邑錢穀一毫不染丁艱歸擢南京國子監學正不赴卒於家縣志郭永達字德彰四會人性恬淡重義輕利爲諸生廩餼不靳與所親共之以歲薦仕嚴州訓導遷沙縣教諭誨必先德行不專以文藝角長士類多宗之謂爲學先蒙養著蒙訓須知皆入聖要論云

黃鶴年字叔永四會人事母孝與友信有古君子風以明經授韶州訓導陶淑士類多所成就遷經縣教諭爲知縣李日文所器重當道薦其政事才任三年卒于官

楊蕃字植卿四會人恬靜和易好古文詞以貢士授萬年訓導連江教諭遷益府教授歸尤苦志誦讀工圖畫以栽花自



適不染世味所著有觀光草靜堂集嘗虞縣志散佚加意紀錄今間採焉

李夢賦字相巖四會人刺史道全之孫也由副榜恩貢行高學博善詞賦工制藝邑人士多所矜式任荏平縣二尹有聲委攝縣事善政上聞將陞任忽值鼎革鄉旋垂橐蕭然毫無失意嘗語人曰遺金悞作生前計種德應留去後人其生平行誼如此年六十有五卒於家

黃上參四會人恩貢生志行清潔生平恬淡自守厯教鄱陽遂溪樂昌屢攝縣事革除火耗民皆急公恐後及歸杜門謝事以詩酒自娛人咸稱其厚德年八十卒于家

蕭騰舉字化鵬四會人治春秋中丙子鄉試博聞強記慈讓清騫輕財重義常爲人解紛居平樂詩酒淡然而處了無介

意人多德之未仕卒於家

譚騰堯字希聖四會人少有英風父爲大羅山賊所害勵志報仇率鄉兵殲諸賊以告父墓時賊每肆刼掠爲民患騰堯要其歸路相機度勢算無遺策賊黨駭散民賴以安調征海南有奇功當事者奏薦方期受秩舟沒於海人咸惜之

陳永繩字俞準四會人少篤志儒業雅重詩書尙大義樂善好施宏治間歲饑捐穀二百餘石散於鄉後值有年各償所捐繩却不受衆舉手加額曰君捐張不受償爲善不圖報得俾君子若孫皆如君吾後人有永藉可乎後繩有七子咸遵父命邑令張齊扁其門曰孝友年八十有五卒

陸中成字信甫四會人性方嚴有學識每試輒高等時以公事率衆鳴於官忤督學意被黜遂絕意仕進養高林泉以莊

見憚於鄉然樂施予能濟人之急邑令葉公黃公戴公咸嚴重焉每語昆弟曰士好修逢時其行也卽不遇亦不失爲善士間以吟咏自娛多可傳誦

陳海字少榮四會人性至孝父晚年生海以故早孤比長就外傳受毛詩感劬勞罔極之言事母竭盡孝養有叔爲商經紀諸商有寄其家者可數百金叔外出以附海忽遇盜夕至海妻以金匿他所無恙盜退或以語海盍隱諸海笑曰吾妻方娠幸而得生男續先人財葬土耳何可昧吾心諸商得完金捐數十金爲贈竟不受

蘇忠四會人志行端方善詩詞布衣爲士大夫所重有詩集

二十卷藏於家

俱同上

李芳春字震元四會人少孤力學士類宗之治尙書萬厯乙

卯鄉薦令餘杭催徵決訟有法民勒碑頌德黃通志

簡聯字思緝四會人性樸行方領歲薦司訓巢縣遷澗川教

諭吳志

劉簡新興人洪武丙子舉人擢江西道監察御史振揚風紀

彈劾不避權勢丰采凜然黃通志

梁新新興人儀貌莊重言辭簡當通五經尤專春秋禮記永

樂乙酉舉人宣德間太平府學教授日坐講席不少懈雖隆

冬盛暑每夕必衣冠危坐思日之所爲以圖改勉或焚香鼓

琴倦始就枕三教郡邑兩典文衡有知人鑑太平府志

陳鼎字重器新興人性端敏篤志於學登永樂甲午鄉薦明

年登進士擢監察御史彈劾弗避權勢出按雲南江西四川

所至畏服遷江西建昌府知府賜璽書馳驛而往涖政明斷

民不敢欺有王府官校恃勢威群行市井掠財傷人捕之置於法錄微泊解穿地得金璧珍玩悉封進其清介如此季父以貞往觀之人廨舍四壁蕭然喜而嘆曰吾家本儒業汝能淡泊可無愧矣超拜右副都御史捕蝗河間諸郡有惠愛改刑部侍郎明慎科條獄無冤滯寮屬莫不敬讓之剛直之氣廉介之操爲朝野屬望正統二年卒於官年四十有八賜葬祭載通志

張聰新興人永樂乙未進士任戶部主事與陳鼎嚴貞同榜稱一時人文之盛以己地讓建尊經閣雍正六年祀忠義孝弟祠縣志

嚴貞字守正號不阿新興人永樂乙未進士授鄱陽知縣政績超著性剛介不爲勢屈忌於中貴遂拂衣歸祀鄉賢吳志

黎常新興人永樂丙戌進士授福建道監察御史按部有聲

貪穢斂跡

同上

馮文暉新興縣廩生嘉靖元年流賊壓境負母逃俱爲賊所擄後得脫具告賊黨寃死獄中前三日作詩云崖山誰作宋家謀我死間關爲母憂自古君親皆一致至今忠孝豈殊流復仇九世思齊主爭死一門無孔哀天地身心誰不愧此生休訝寄蜉蝣左叅政嶺西道羅僑爲文以祭督學蔡克廉旌曰孝子

縣志

潘游字君迦新興人嘉靖二十五年選貢爲龍巖學訓導篤學少言厭華敦樸慕陳白沙先生學每早起必衣冠危坐代巡蔡夢說按肇訪之杜門不見

郝通志

簡直新興庠生居母喪三年不離苦次食必齋素不入內室

坐處產靈芝人以爲孝德所感邑人彭津爲之記督學王璽旌曰孝子虞部陳文顯過其廬紀之以詩子載道厯廉州府教授敦厚和睦不墜家風

志

李元傑新興人性樸實父直舉人旣喪服闋慕白沙先生往請作墓志遂師事焉先生嘉其誠號之曰習隱平生口不道虛言足不履公門膝不屈官府壽八十二知縣胡堯時旌曰處士

柯英新興南城外人隆慶二年浪賊陳明山寇邑大俘北郭官兵不知所禦遂縱掠而南人心震懾城內外關廂惶惶訖無所恃英大怒鼓衆迅起曰鼠輩猖獗自北而南戕我戚族不大創之何以生爲衆皆奮發遂率其屬與賊戰於西郊凡三日夜賊大敗引退英欲盡殲之乃匿跡躡後斬其魁首衆

恃以生歸渴甚索湯不及飲水竟卒邑人哀之會葬於二龍

岡題曰英烈柯公之墓英烈者私諡也

梁晃撰傳

今二龍岡有兩

塚聞英沒其馬亦死邑人并葬於其側云

宋訪冊

趙良訖別號偶峯新興人以歲貢爲平樂府教授致仕歸彈

咏自娛兄弟和愛年八十著有長嘯集十二卷

吳志

黎時中新興人歲貢生南雄府司訓設鄉塾以淑問里之子

弟瘞暴骨置祭田建圍寨皆人所難能者年八十六卒祀鄉

賢

劉夢賜字良弼新興人隆慶庚午舉人授連城知縣興利革

弊卓有政聲居父喪廬於墓側刻有維俗家禮詩集

俱同上

梁玠新興人由貢入太學授衡州府學訓導陞永福教授未

至任卒性孝友早遊白沙先生門冠婚悉從家禮居喪不事



浮屠捐俸置田遺石鼓書院還家橐無餘貲

縣志

黎王臣字體贊新興人隆慶時弱冠補郡諸生試輒高等勵志勤苦尤敦實行父時中性至孝遭兩繼母皆不得其志父卒繼母趙氏遇益少恩歲入歛而私外戚者什之九時中不問也惟資館穀以奉甘脆母意猶未釋時中憂莫解一日王臣長跪曰祖母之難豫非大人孝未至也有兒輩仰分歲入耳乃日茹素衣單衣代時中治生時有贏餘非惟不敢仰冀祖業且能恭順於是趙氏愛王臣復愛時中王臣與弟永不分產常戒其子曰後卽不能如我願汝取田廬器物之瘠敝者間巷有貧不能喪葬卽助以貲鄉里稱焉

縣志

其卒也陳子

壯誌其墓

采訪冊

彭津字濟之新興入少穎悟數歲時同羣兒戲河畔知縣王

民順見而奇之試以題立就讀書衙齋中萬厯辛卯舉人厯

戶部主事陞本部郎中

縣志

趙羽字元翰新興人由貢生厯廣信府學教授性孝友所得

俸錢置產分遺其弟設險拒寇鄉黨藉以衛焉祀鄉賢

同上

歐鎡新興人由貢生入太學授巴陵主簿未任卒性好古不

隨流俗居親喪廬墓三年用文公家禮去浮屠至今子孫世

守不變雍正六年祀忠義孝弟祠

吳志

梁儲臣新興人恩貢兩中副榜授濟寧州判質言敦行居官

卓有政聲爲士民留愛雍正六年祀忠義孝弟祠

同上

簡載道字伯傳新興人歲貢厯歸善廉州教授卓有師範以

淮府紀善歸祀鄉賢

縣志

陳濟字君楫新興人以貢入太學兩中北闈副榜授將樂主

簿開義塾以訓閭里子弟廣立鄉約爲族黨式剛方有執知縣王民順雅重之嘗贊修文脉水建文昌橋至今享其成功麥子仁新興人性樸直補邑諸生爲鄉里祭酒所訓士多選拔子安舉於鄉益折節恭儉生平不見官府不與外事耄年猶權攝蒙學不忘接引鄉評推重壽八十三門人梁篤培記趙良學號文波新興人邑庠生端方樸直有古風母八十餘病卧十年飲食藥餌必親奉年七十凡母溺器衣被輒躬操理

伍啟泰新興人崇正元年恩貢性孝友事祖事父敬謹無違粗衣糲食弟姪共之精春秋學爲世所法

顧鳴鸞字漢望新興人清和清雅以詩經教授生徒者幾二十年應崇正己巳肇慶府學貢承先志建宗祠置義田供烝

祀贈隣族資賓與卷金辛未入對時晉陵門人馮祖望暨門下薛案俱成進士感高誼京國名卿相與唱和成帙稱勝事焉雍正六年祀忠義孝弟祠俱同上

潘夔字以亮新興人賦性孝友父癰卧十二年時刻不離左右父母呻吟卽撫摩搔抑餘則讀書楊所田舍悉自營置與弟共之事諸叔如父撫諸姪如子義直真誠面折人非人皆諒服改過恬澹無求好周人危困生平不入公門資稟敏穎弱冠補郡弟子員應崇正十六年歲貢廷試考授訓導未任卒雍正六年祀忠義孝弟祠吳志

王臣丹字葵義福建晉江人明季遊粵會考選流寓將以次

授官應試高等任新興司訓和以處士立籍居新興焉縣志

潘毓珩號他山新興人崇正己卯舉人聰穎好學誠事父母

和愛弟姪邑人稱之

吳志

蘇宇元字爾坦新興舉人任鶴慶通判平生喜談方畧崇正

七年賊刼觀洞宇元統率鄉夫救援賊退越數日肇慶督捕

官高居爵領兵至宇元會同躡追至陽春菩提深圳生擒賊

首馬三等四十餘人順治三年賊眾西刼還過排村宇元率

眾邀擊被賊首麥亞甲所殺恤典未及官民悲悼

縣志

崔士暉陽春人績學善屬文洪武中邑令梁潛邑丞吳子育

皆留意作士見士暉文器之尋以永樂戊子舉於鄉潛爲撰

題名記同時莫尙俊莫璵南並以明經膺永樂癸卯鄉薦與

士暉俱祀鄉賢

縣志

林桂陽春人宏治七年流賊犯境桂分兵截擊之斃賊一十

九人賊眾潰亂救出被擄者百餘人旣而暗自巡邏猝遇賊

奮戰死本道陶魯遣官致祭焉

徐洪陽春人爲小旗宏治十五年十二月十六夜賊犯城洪與總旗胡玉力戰洪以鈎刀殺賊甚衆賊乃退民以保全旣而洪復追捕賊猝中暗鎗死聞者惜之

吳紀陽春人南廂義民官宏治十五年之役賊犯城居民避於西門樓紀會總旗方仁奮力擊賊退之保全男婦無算劉廷亮號枕岡其先閩人僑寓於陽春遂籍焉憤猺賊披猖與伍林黃姓者捐資赴廣西招狼兵剿平之以諸里排猺所踞民間田蕞與狼兵自耕而食防守汎地卽以伍林黃三姓世爲招主猺患以息至康熙四年撤去招主悉歸保長然其功不可沒也

同上

按是役也伍林黃並有功桑梓而舊志於劉則書名

餘祇書姓豈當時傳聞異辭故畧之耶今世遠年湮益難稽考惟邑之伍氏宗譜載其祖伍經綸廷亮捐貲募兵剿平猺寇事與此同然則志所稱伍姓者殆卽經綸歟噫文獻闕而一介義士並姓名湮沒弗彰者多矣伍林黃諸人猶得以姓傳不可謂非幸也

縣志

梁棟陽春人正德間歲貢生講學不受脩脯不履公庭由教諭遷壽府審理謝官歸囊無長物年八十卒殮無衾槨鄉人賢之祀鄉賢

縣志

汪漢陽春人歲貢生幼喪父事母克孝捐金爲族弟畢婚時西山弗靖二司舉爲泰贊有平寇功初授泰州州判陞福山令門無暮夜之金民有倉箱之慶獨修邑志百廢具舉祀鄉賢

嚴儀陽春人有謀畧嘉靖二年討賊親擒賊首械解軍門八年奉檄募兵三百截捕又獲賊首任元周三龐飛雲李把界等二十七名屢立戰功

賴麒陽春人由歲貢任金華府訓導陞龍泉教諭請復勲臣崇祀之典賻助同寮蕭愷之喪致仕歸里絕跡公門故人梁棟父子三喪皆爲之殯邑人義之呈請大吏於嘉靖辛酉題祀鄉賢至萬厯甲申知縣黃憲清奉文清查出之然迄今人猶景仰也

賴玉德謝詔陽春人俱千長嘉靖三十一年流賊刼高明知縣謝復生奉委調兵廉知玉德詔俱勇敢督合統兵往捕兩人奮不顧身皆爲賊害

何萬邦陽春人嘉靖三十一年流賊刼陽江萬邦借兵截擊



之亾於陣

汪雲梓陽春人邑諸生萬厯四年倭賊圍陽江甚急值久雨城多頽壞先是梓計誘倭人三十餘徒養之於家至是得所招倭人擊賊圍遂解

謝詵字步川陽春人由歲貢任江西寧州同知幼孤與兄介川相依爲州貳恬淡謹謙開誠先物有少年坐博得罪詵憐之戒令肄業後登第以廉能轉靖江審理

伍聚奎字星宇陽春人萬厯二十四年歲貢任歸州州判御下精明吏民不敢犯上官倚任焉興利除害卓有政聲

胡秉忠字葵台陽春人萬厯己酉鄉薦任江南六安州牧威信明敏任事慷慨政暇以興賢作士爲務安俗素健訟秉忠涖任豪猾屏跡州人稱治

梁崇伯字譚勲陽春人端謹和平與物無競性仁孝母死躬  
上木之役斷木爲斧所傷身歷木下若有拔之起者或以爲  
孝思所感云子應材成進士崇伯愈謙抑日與素交載酒放  
談不與局外事人咸重其品祀鄉賢

張所學字彥博陽春人由貢生任廣州府訓導日與諸生講  
明性理之學陞連州學正州故僻陋所學多方訓迪風俗翕  
然興起

陳諫字冲元陽春縣人貢生仕江西安義令攻苦茹淡勤於  
民事時縣里甲遞年供役諫悉遣歸農前官催徵苛迫民多  
逃竄諫加意招徠俾復業以休致歸

楊鳳鳴字詡圭陽春人萬厯壬子舉人好學能文工詞賦著  
作甚富經兵燹散佚性倜儻喜談兵時流寇騷擾當道督師

撲剿鳳鳴率子弟壯丁偵知賊形勢指授方畧擒賊首吳馬其平寇詩至今傳誦之

梁應材號瑤石陽春人萬厯壬戌進士初授江西進賢令進賢爲豫章劇邑應材以寬簡臨之而政無不理以艱去起補蕪湖令甫下車進父老於庭問興革利病乃興學宮疏泮源繕隄堰申保甲繇是文物蔚興奸宄潛息兩攝關篆稅課外不問餘羨一切陋規悉除之以治最擢駕部主事尋遷吏部員外郎益清慎自矢及歸杜門不出鼎革後屬家人但呼曰阿翁後二十年卒壽七十二

羅光岳陽春縣澗水人由歲貢厯任雲南三泊令三泊地近滇多佛剎光岳至以清淨爲治本有盜誣陷良善富民多受害爲辨白釋之問民疾苦革火耗清徭役去無名之徵開陂

池之利受其惠者頌德不休

謝良垣陽春人由歲貢任曲江訓導性恬淡寬和廉介自勵課生徒隨事規戒悉心訓誨多所裁成庠序中有抱屈者力爲申雪其人固未嘗請也

馮士琦字華宸陽春人萬厯戊午舉人官四川雙流令性方嚴却苞苴修學校抑豪猾塞弊竇興廢墜民多雜派浮費悉爲請豁及歸囊無長物少時與兄士瓊讀書西河龍巖庵至是仍課子姪於其地日與知己賦詩娛志

何謙字抱虛陽春人萬厯間由歲貢任江西樂平丞處心寬恕政無苛擾民供析薪謙嘆曰丞何功而受此耶樂平習俗獷悍謙嚴什伍之法奸不能容以病歸

伍賢陽春人以崩石莊產捐爲學田縣尹熊烈記其事同時

有黃裳字尙禮捐山口莊田歸學皆有功賢序焉

楊鳳翔字超凡陽春人崇正元年歲貢生初任福建崇安縣丞秩滿報最陞山東東平州州同時大旱民相食任是地者多畏蕙鳳翔單車到官撫恤備至攝鄆城縣事調劑上下間軍民倚若父母解組歸囊橐蕭然卒年七十五

梁之屏字翰之陽春人由歲貢授羅定訓導轉廣西來賓教諭飭躬講學士類尊之嘗捐俸修學宮晚年居家敦厚樂易與物無競人稱長者

黃守誼字屺依陽春人由歲貢任福建古田訓導闢學舍立文社課士如家塾子弟不問束脯賦性慤直與人落落難合遇縣令有阿私不平事輒切諍之坐是取忌棄官歸十餘年足不履公庭明末授國子監學正著有燕京興五華風韻荔

枝集年七十三卒

汪萬垓號水西陽春人崇正乙亥歲貢生純厚端嚴勤學好問爲鄉里祭酒善誨人及門多掇科第者生平無詭言不與外事雅好吟咏日與親故唱和稱韻事焉卒年七十五

謝鏜字天聲陽春人崇正庚午舉人志行卓越以古人自期再上春官不第卽希蹤高隱和陶淵明歸去來辭以見志鑿池引泉栽竹灌花日以課子姪爲事不入城市者二十餘年壽六十六

謝鑛字天治陽春人崇正壬午舉人幼嗜學以經術名里中好獎引士類登科後敝衣藜藿不厭性鯁直遇寇至大罵不屈遂被害年七十八

梁燧字真傳陽春人歲貢生篤志於學奉父母問膳請衽愉

色和氣先意承志人無間言

張宏位字素之陽春人由邑庠入國子生任承天府通判魁奇磊落鯁介不阿每出議地方事直言無隱凡可爲閭邑計安全者無不殫力爲之

謝之棟字凝之陽春人性敏慧過目成誦經史百家靡不淹貫鯁介孤峭不隨流俗爲文獨出機杼崇正壬午鄉試棟文奇甚初擬元後改置副榜第一以薦授兵部司務

劉裔灼字嗣華陽春人由明經任信宜教諭事親撫弟性孝友讀書恥秦漢以下年六十領青氍時兵荒學廢裔灼捐俸重修申訓多士嘗語諸生日學人縮頭角好脂韋如衾影何歸里後爲僞賊所困正色拒之賊不敢害土寇逞毒鄉鄰裔灼請兵高州剿平之上

俱同上

歐陽念太學生陽春人宗正五年流賊迫城念率鄉勇與賊

戰生擒賊首蕭阿四邑人賴之

志

陳炳璫字瑞御歲貢生陽春人純謹自守人有過耳不欲聞  
惟就善者獎成之僮僕有違亦不加鞭撲微以意諭之而已

上同

林茂陽江人洪武中以明經任龍江稅課司副使坐事籍其  
家文史之外一無所有上嘉其廉命復官益勵清操迄於宣

成泊如也

縣志

徐鼎字宗器陽江人其先自台臨海徙廣州元至正間鼎父  
椿爲提舉委攝南恩州同知遂家焉時叛寇何均受據州洪  
武初大兵南征鼎率鄉兵援之四年守郡步公薦鼎儒學教  
諭赴京考驗授西安府鄠縣知縣先是鄠縣丞鮮于去攜夫



妻繼沒遺幼子女育於主簿徐昇家昇去鼎助之還鄉九年  
陞燕府審理賜寶鈔勅禮部給醵酒隨授文林郎十二年以  
病告歸燕王遺之琴詩云故人今日辭官去行里蕭蕭祇抱  
琴萬里家山勞夢想百年肝胆附雲林枕椰綠障香烟暝荔  
子紅垂夜雨深歸去故園清絕地也應剛爲白頭吟後王登  
極寶書帛存問其家

同上

徐季字則中陽江人徐鼎之子洪武十九年貢入太學次年  
差往貴州整點軍士三十二年差廣洋衛協政永樂三年任  
紹興府同知陞潯州府知府以才堪治劇復調知武昌再調  
知松江治績大著去之日郡人構留慕亭思之

郡通志

劉源陽江人永樂中以貢補應天府推官歷陞浙江鹽運副  
使東昌知府所至多善政東昌民立祠祀之家居清儉無餘

蓄俗好飯僧佞佛源持正論以抑之

縣志

陳衡字祖平陽江人其先莆田人宋陳宓之曾孫應鰲於元至順二年官南恩學錄遂家焉衡乃應鰲元孫也永樂丁酉舉鄉試補上舍生授工部主事以艱歸服闋轉南京戶部尋以汰冗註籍景泰元年復職詔督徐州百步洪卓有治行作潭底月百餘章以見志

沙浩陽江人少警敏過目成誦年十七領永樂十二年鄉薦任福建莆田訓導以稱職召入京命方下而卒士類傷之

吳志

劉芳字永錫其先侯官人父任太平驛丞以才能攝陽江縣事多善政時芳年十九善屬文鄉先達徐季以女孫妻之遂入籍尋舉成化丁酉鄉試次年成進士授江西靖安縣知縣廉介抗直聽訟明決厯陞戶部郎中擢知南寧府政治尤著

以愛民忤上九載不遷後以招撫田州功賜勅慰勞錫以金帛秩滿至京遂致仕以子竝官誥封大中大夫所歷郡縣並祀名宦祠

縣志

鄭致和陽江人博學能文高自期許雖屢蹶而其志不撓永樂己亥貢至京景泰癸酉應順天鄉試遊辟雍三十餘年以明經終邑人景其行而悲其遇云

劉竝字伯度芳子舉宏治甲子鄉試連捷進士授如皋縣知縣陞兵部主事轉光祿寺丞時嚴嵩執政以竝有重望欲羅致門下竝托疾告歸構亭城畔歲時宴集談經賦詩當道屢舉不起巡方者造廬請謁皆謝絕之

俱同上

其登鄉榜名次連

取科甲絕肖其父

黃通志

著有陽江縣志萬厯初與父並祀鄉

賢

縣志

支榮字世華陽江人舉宏治乙卯鄉薦任桂林府學教授誠信孝友爲當時推重

陳璘字天瑞陽江人力學甘貧以氣節自負正德丁卯舉於鄉授會稽訓導乘官歸布衣蔬食風節凜然嘉靖中侍御毛鳳璘會稽所造士也巡方粵東謁璘值璘課僕理竹因吟曰馬眼籬圍牛角簪鳳曰龍鬚席疊象牙牀璘笑曰貴賤分途相去爾爾遂款留竟日食糲茹蔬依然菡萏家風鳳趣赴省璘至一晤卽辭去

陳桂芳字秀甫陽江人正德己卯以鄉薦遊太學尋以艱歸服闋謁選得知清流縣事居官五載慨以圖史自隨刻意著述遂告歸所著有黃鐘考泰同契轉解山居日錄等書江邑文獻久衰芳邁往特達爲後進領袖子乃父萬厯間以貢授肇慶府志

東莞訓導

林接雲字喬登陽江人嘉靖甲子舉於鄉授祁陽教諭陞京山知縣再改上林縣誠信坦易興利除害聲聞烜赫去之日工部員外吳焯率林人鑄石思之愿彌勒知州陞撫州府丞所至尸祝久之以秦府長史歸

許信字以孚陽江人嘉靖初以貢授德化教諭年四十卽解組歸隱居三十餘年恬淡寡營超然物外

劉琳陽江人布衣醇樸嘉靖中爲鄉飲賓劉光祿時攜鳩杖與之遊年九十餘歲

羅士毅字惟遠陽江人少孤奉母沙氏孝謹一蔬一果非奉母不敢嘗族有欺其孤者逼之往役士毅赴縣請以儒免令曰童子能文乎面試之立就遂免其役母歿哀毀骨立三年

如一日有司高其行爲旌其母隆慶庚午以歲薦授侯官訓導陞田州教諭訓諸生一本於孝弟每歲俸入輒垂涕痛祿養之不逮也尋歸以壽終

岑經字天常陽江人性孝友寇至負其幼弟維逃匿山中維有夙疾盡割其世業讓之嘉靖中以貢授天河訓導陞廬陵教諭時值苗寇邑有民兵數百上官以經知兵檄經閱之簡練數月卒以退寇上官嘉其能欲拔置邑令以足疾告歸

趙世清字叔介趙宋之裔也宋自崖山敗後子孫冒姓馮氏潛遁南恩之海朗寶樓等村二傳至德重乃復姓七傳而至世清博極羣書詞藻宏麗爲邑諸生屢舉不售萬厯初以恩貢授延平訓導旋告歸

施孔儉字叔仲陽江人性慷慨周人之急萬厯己卯舉於鄉

授漳平知縣漳地多毒草食之輒斃儉下令芟除草枯禍絕  
以嚴謝請託失貴人意遂解組歸薄田數頃半以分給兄子  
里中貧者婚葬每捐資以助之橐無餘蓄晏如也晚年買舟  
載琴書放棹自如自稱水月主人

蘇復生字孟陽陽江人知南平縣事與人溫抑長厚萬厯初  
檣李沈思孝以抗疏流寓陽江甚重復生稱爲畏友以貢授  
遂昌訓導兩署邑篆士民佩德再轉龍門教諭一時有蘇湖  
之望

劉景廉字孟循南寧太守芳之孫也父津病咽累歲景廉方  
弱冠侍湯藥頃刻不離左右居父喪絕粒哀毀苦塊三年不  
入內室郡司馬彭鳳翀邑侯林恭章遇以國士景廉益謙退  
所著尙友信安諸稿高明區大倫序之

李天培字承之資性穎異博學能文萬厯甲午以貢補太學生庚子領鄉薦甲辰成進士初授承天府推官有平反功羣視篆沔陽多惠政後改處州兩校棘闈得士甚著秩滿陞南京工部主事督理蘆政越二年以艱歸未服闋而卒

羅尙質字黜浮士毅之孫也事繼母吳氏惟謹萬厯辛卯舉於鄉授景陵知縣以艱歸補潯浦縣居官三載多政聲解組後杜門自守三舉賓筵其沒也與其祖士毅同祀鄉賢

徐鳴陽字鳳喈松江知府徐季之孫也少英敏倜儻自負時與邑中梁大用盧樂輿爲莫逆交樂輿中道夭鳴陽與大用兩人破產營葬不遺餘力萬厯三十年以恩貢判饒州再判臨安皆有循聲

許效忠字翼軒陽江人垂髫補弟子員淡泊自甘不妄交與



萬厯王子以選貢廷試第三欽賜寶鈔忠感激異數以力學成疾中道夭折士論惜之

蘇復光字仲明陽江人年弱冠補弟子員爲文沉潛淵邃每入奉父兄柔聲愉色內外無間言比卒年僅三十有二

黃尙彩字居素陽江人補邑弟子員性孝友事繼祖母克盡孝養貲產中落而飲食起居常與諸叔共甘苦諸叔先後淪沒弟妹婚嫁皆身任之

梁澄陽江人萬厯初爲邑廩生垂二十年將登歲薦一夕忽作隱居計同志者以爲迂澄曰余第行其意耳頃之學使當校士澄遂列狀謝罷

姜仁浩字源津陽江人生平敦孝友重然諾歲飢竭倉庾以贍閭里年九十六屢舉鄉賓萬厯間邑令林恭章詳給冠帶

旌表其門

林鳳獅字愛梧陽江人萬厯初年以貢授臨桂訓導謙退恬淡不事封殖睦宗族置義田有文正之風焉

李天毓字晬之天培之弟也幼失怙遵母氏訓勤苦力學早歲食饒十載棘闈三舉德行生平孝親課子嚴氣正性士林稱之

陳登雲字超衢陽江人與同邑李天培俱以經學著天培成進士屬其子弟師事登雲崇正四年廷試高等豐城李右讜以侍御在都門助資斧勸以求官不從遂歸季弟登仕有隱德其家故饒自雲曾祖母梁祖母林相繼守節族人侵之日就消乏仕弱齡任家務不蓄私財垂老方析箸君子以爲難李天材字太行天培之弟也崇正二年由國學任浙江龍游

主簿息訟興行視民如子抱疾而歸垂訓子弟以勤儉節戒  
四箴勒於庭

梁拱極字光南黔江知縣梁大用之姪也平生以禮義自持  
潛心理學耿介不阿廷試後以林泉老

梁樞字子衡崇正九年拔貢與其子世耀並有文行樞母蔡  
氏年九十八歲按院李雲鴻旌其門曰德以壽母

蘇光軾字宇堪陽江人崇正十四年歲貢篤學力行始終不  
倦邑之俊秀多出其門

杜穎昌字敏公陽江人自其祖惟善以待御起家代有碩德  
崇正癸酉舉於鄉年二十五屢困公車力學不倦其姊庚姐  
未字而貞奉勅旌表節義文章一門並著識者以爲其父拱  
陽積德所致云

何如禮陽江人家世鄉居建祠市產以惠宗族族食指千餘  
禮敦睦之如一室

林高標陽江人少攻舉子業清貧自守嘗還遺金拯溺人畧  
無德色邑令李餘莪高其誼造廬加禮焉年七十餘屢與賓  
筵

馬如龍陽江人雙魚所正千戶性至孝朝夕奉母恐不逮母  
病將革龍禱于天願以身代母索食龍割臂肉啖之病遂愈  
巡方使者旌其堂曰知孝

譚瑞龍字輝白陽江人仁愛喜施意豁如也而溫恭朝夕執  
事有恪里閭推爲長者年七十邑令馬之瑛給冠帶旌其門  
子世葵歲貢能繼其志

俱同上

譚克忠字常子高明人自少警敏博通經史洪武八年因梁

伯英薦兩至闕下皆固辭賜宴及綿絮遣還十六年郡守王全以明經辟訓郡校十餘稔學宗程朱時名士若余存諒陳臬皆出其門

縣志

謝迪字惠齋高明邑原生寬厚能容力學不輟以孫官貶贈奉直大夫中歲時憲副羅黃裳以假歸課士於頻每月照闈中例試以七義迪文輒居異等裳解繪衣衣之嘗有宅邊地爲豪隣所侵或勸之訟迪不應人服其量子家運家基家寶及諸孫充邑庠者八人孫文禱乙卯鄉薦仕至賓州知州

吳志

黃泰字仲憲高明人由歲貢任晉江訓導轉懷遠教諭淹博古籍課士有方於贊餽之禮無所求焉從祀名宦有鳴真集

縣志

何珍

縣志作眞

字嵩山高明人三歲失怙恃喜讀書以父母不見

爲恨遂絕意功名每食必慟終身衣縞食不兼味學者稱爲

一味孝子宣德中郡守王磐以狀請乃旌其門

郡志通

嚴纓字宗冕高明人質樸剛直性孝友正統己巳有寇作纓甫九齡父母胥蹈於難纓號泣中野招魂而葬之比長移居郡城能自力學以成化歲貢授融縣教諭以師道自任遷石城王府教授致仕歸以勤儉爲訓有遺教錄長子逢字時鑑宏治辛酉舉人署龍陽訓導與諸生講業程課若李清鄧璽輩皆以科第顯著有記講緒餘次子逾字時鎮宏治戊午舉人知河池州踰年以母老棄官歸自少至老手不釋卷著有

有定集

吳志

譚南昌字邦獻高明人窮經博學遊葉正之門以忠義相許由歲貢授長樂左尹有異政致政後請邑令唐簡建學明倫

昌在大學受知於祭酒吳節學成之日親往安成請序勒碑其用心名教如此年九十著有青玉軒集祀長樂名宦

縣志

林鴻字時舉高明人敦厚和平言行不苟官浙江都司任事

秩滿還家不復出時嘉其恬退

吳志

譚維城字國基高明人孝友厚德佐貳新城未老離職恬靜可嘉

楊楚字秀夫高明人少負才氣居葉正確齋門下聞春秋大義正統十四年黃蕭養叛楚與杜福敘等力爲保障天順三年葉正討西賊遭陷計至卽大慟切齒爲師復仇未幾西賊數千流劫蓮塘等都或曰卽殺葉正者也楚遂挺身赴賊追至橫石斃於鋒鏑年三十有六當道者上其事於朝旌曰義士遣行人曹隆諭祭初祀府鄉賢嘉靖二年復題准回縣立

祠

嚴貫高明人性至孝母病叩天請代喪葬長毀幾殆有廬居稿

李邦祥字兆卿高明人舉正德丙子鄉試爲方伯吳廷舉所器重教諭棲霞勤講課時給諸生膏火教諭長泰亦如之助修學宮祀於名宦遷國子監助教出判南寧值田州兵後民疲於征力求平賦均徭調常州署宜興縣開江陰河五十里灌田若干頃秩滿致仕

譚臬字子高高明人重厚不妄言笑歲貢任思恩訓導陸川教諭幾二十年家產僅十餘畝里豪侵其祖墓臬往諭之豪攘臂拳其面者三受而不校其量如此

楊衡字南季亦高明諸生家世饒益而自御淡素督學魏校



以富而好禮稱之歲貢司訓洛容轉建陽教諭一時名士多出其門

譚宗懿字德良高明人潛心古籍尤長詩賦以歲貢入虎闈列上舍告省歸嘗於錦崑勝會與程驥程輅熊兆平同聲贈答著有品雲集子維弼通方博物出湛甘泉之門嘉靖二年歲貢授湖廣德安府孝感縣二尹值上崇大孝梓宮南附弼奉公勤職奉勅旌賞三世明經

區曰琳字世璋高明人幼聰穎過目成誦補高要學博士弟子員蚤失怙孝事其母定省暇博洽羣書精於易學爲文自成一家中年怡志山水自號養閒嘗賦詩云分付兒孫勤結網一番春浪一番鱗

譚超字逸才高明人和易罕言遇人不設城府口未嘗稱人

過失爲諸生三十餘年遂例授冠帶優遊林石間絕意進取  
親族凡有爭訟爲之解紛黨里咸敬服之卒年九十有七曾  
孫良泰登順治辛卯賢書

嚴相字汝弼高明人嘉靖九年選貢知興安荔浦二縣與經  
厯劉信約爲婚姻未委禽也信卒於官其家以貧辭相曰其  
如死友何卒命子娶信女而恤其家荔浦多盜相至盜壘諭  
以禍福無不稽首願降授以閒田遂爲編戶未幾乞休家無  
餘蓄嘉靖辛亥賊掠豸岡戒曰無人嚴荔浦家也

區益字叔謙曰琳子少穎異淹貫羣籍舉嘉靖庚子鄉試授  
都昌知縣有善政以忤使者改泰順是時倭賊躡閩浙益甫  
下車而賊五千突至邑在萬山中素無備益納城外居民而  
焚其廬舍益藏母爲賊據率士卒乘城繕樓櫓雉堞擊刁斗

自衛募壯士數百乘間襲擊斬首三百有奇賊乃遁去是時  
賊所向無堅城以泰順挫其鋒東甌得不殆益之力也上功  
幕府遷慶遠府同知至慶遠有古田之役益督西路兵有功  
會以憂去服除補温州士民喜曰是向挫島賊泰順公也無  
何又以忤當路歸著有阮溪草堂集卒祀温州泰順名宦祠  
郡邑鄉賢祠子大樞大相大倫皆以理學文詞世其家俱同上  
羅黃裳字美至高明人嘉靖己未進士性資惇篤無疾言遽  
色補吉水令以忤權門調雲夢轉南大理寺評事民立祠建  
碑以紀去思改北恤刑平反有聲出守平樂地瘠而險多盜  
粵大萬厯四年與府江道徐作計擒巨魁周公樓黎莊諸賊  
定上下四屯設兵防立寧化里以增國稅粵西載議設昭平縣  
以握其吭陞貴州按察司副使以足疾乞休子建婁建箕皆

有時名族兄煥章字美充領嘉靖己酉鄉試

與黃裳同科

授壽寧

教諭以內艱歸服闋補山陰時鄒東郭請陽明學從之遊躬

行實踐尋丁外艱補宜春陞龍溪尹富戶爲奸餽以千金麾

之而正其罪時稱其明山陰門人王泮表其門曰明世儒宗

所著仕學類編及家錄傳世

粵大記

羅煥章字美充高明人舉嘉靖己酉鄉試署福建壽寧教諭

分闈雲南補浙江山陰教諭課士得張一坤王泮又補江西

宜春教諭分闈四川陞福建龍溪尹有去思碑後遷荆府正

審理旋鄉與縣令徐純督建東洲寺及兵巡道王泮督建文

昌塔設東關墟總理開黃絲界溝引水灌田數百畝通志云

羅黃裳與兄煥章同發鄉榜俱有名於時云

吳志

何天衢字大行高明人幼穎悟潛心舉業篤學力行弱冠中

嘉靖辛酉亞元屢上春官不第授直隸旌德司訓興學勸賢弟子翕然宗之有李生者爲里豪所訟欲寘之法且多所株連衢白於當道悉保護之以異績陞賀令賀適凋敝衢下車扶弱鋤強釐奸剔蠹不遺餘力歲歉給牛種周困乏民懷其德以疾卒於官百姓追思立祠以祀之子五人四登黌序次可踰中萬歷甲午舉人蓋盛德之報也

楊紹程字翠庭高明人博通經史善屬文邑令徐純聘修邑志以歲貢授清遠訓導陞揭陽教諭先德行而後文藝士風振起

嚴簡字海峯高明人性至孝竭力事親親沒既葬創永思亭於墓左出入必先拜告朔望亦然內外以孝行稱之曾大尹旌其門曰孝子之堂

嚴機字用敬高明人以監生授靈川縣主簿革限錢不待捶楚而課最民稱嚴菩薩遷融縣丞子貞字道興歲貢任長寧教諭族子大業以孝友聞

俱同上

譚舜典字帝則高明人邑諸生嘉靖癸亥新興恩平賊掠丙洲獲舜典父舜典詣賊營願代父歸營贖金許之會同知呂天恩捕賊至楊梅都賊敗得脫歸時被掠死者無數獨舜典父子俱存人謂孝感

郝通志

何一麒字文明高明人博學能文雅尚節操諸生時爲邑令徐純聘輯縣志登隆慶丁卯賢書署興業教諭潔已飭躬表率多士陞龍安知縣平徭役省冗費民有過者不爲苛法晉大理通判權府衆督責勸課爲一時賢牧歸裝一肩大半圓

書而已

吳志

劉徵字可久高明人家貧好學文不屬草隆慶丁卯鄉薦由四川合州學正遷廣西融縣令融當殘破豪者沒田貧者逋欠徵下車悉爲清理修築土城至今賴其保護未幾以疎節忤當事謫閩臬照磨署永福縣爲檄驅虎禱雨輒應民咸以爲神司李永昌土人向化豪強斂手居家奉繼母無間言睦鄰結社尙忠信至老年不衰

劉時可字志孔高明人登隆慶庚午鄉書授南京徽州縣縣教諭溫雅和平造就有方每立規條必以身先之諸生贊餽一無所計祀縣縣名宦祠陞浙江奉化尹改惠州府教授及鎮江府教授遷楚府紀善著有梁湖集羣書拔萃分門玉屑藏於家

區大樞字用環高明人嗜學博古早舉孝廉謁選得郡丞不

就趙蘭谿作相辟內閣中書亦不就晚年令安遠愛民潔已  
轉岳倅督餉九永清淨不擾一如治安遠數月卒於官故里  
所攜囊不贏一錢性喜佳山水雨附叔弟大相使車多題咏  
有振雅堂廉江岳陽稿若干編爲嶺南文獻俱同上

區大相字用孺高明人爲文有奇氣援筆數千言萬曆癸酉  
與兄大樞舉於鄉己丑與弟大倫成進士選庶吉士授檢討  
同修國史經筵展書厯贊善中允掌制誥居詞垣十五年趙  
蘭谿張新建沈四明先後當國蘭谿忤江陵遷嶺表以古文  
詞受知及居政府引避不輕謁嘗肄業南雍新建爲大司成  
深賞重後柄政欲汲引託所知諭意不答以是東宮講官京  
省典試一無所與四明移居比鄰竟鬻宅遷避四明以是爲  
憾吳志調給諫又調南太僕寺丞二年移疾歸里居八年卒明



季前後七子稱詩號館閣體大相始力祛浮靡還之風雅奉  
命慰齊晉吳越嵩洛衡湘士風遺跡民瘼國計咸著篇詠性  
至孝追遠若孺慕生平恥干謁公論侃侃義形於色積俸置  
祭田外悉周親友急六經微言奧旨箋傳未發所著太史  
詩集使集圖南集濠上集制誥館課雜文行於世

吳志

區大倫字孝先高明人

大樞大相弟

少負氣節萬厯壬午舉孝廉

與兄大相肄業南雍時海忠介在留臺直聲震天下大倫與  
之甚洽己丑成進士宰東明勸農桑教孝讓歲歉鬻子女者  
悉爲贖還出稅契羨買牛數百以給貧乏入覲策蹇數千里  
面目黧黑授御史草疏必焚香涕泣期於誠感神宗朝諫不  
親郊祀奪職歸築烟霞圃一褐衣二十年坐處皆穿灌園讀  
書晏如也郡邑不識其面有欲周其乏者卻之以詩潛心學

胙夢陳江門贈以詩句益透悟直標明明德宗旨曾集訶林  
與士大夫明辨居數年四方從者愈眾建蓬山滄溪二書院  
爲會講光宗卽位起光祿寺丞轉尙寶南太常寺少卿署南  
祭酒掌翰林院事恢拓湛甘泉書院講學留都其學抑狂進  
狷以挽頽風闢禪僞絕黨徇以衛聖真裨實用熹宗初進聖  
學三劄保艾聖躬規切時政上嘉納之以大理左少卿入侍  
經筵黨人側目由太僕卿改南戶部侍郎時璫焰方熾郎屬  
附之者悉糾彈無所避附者恨欲中之復奪職歸崇正初還  
原職未幾以疾終於家及門士執心喪凡若干人常曰吾生  
爲二事一崇正學一佐太平今耄矣將寄撰述以俟知者疾  
且革猶惓切後學言不及家事所著有大學定本四書翼南  
都講錄端谿日錄崇正闢邪錄端谿遊稿江州存稿諸書

黎衷字文和高明人敦行力學萬厯間兩登副榜由選貢授江南常州府通判崇大體釐積弊斥衙蠹擊奸僧以除害築芙蓉堤濬桃花港以興利攝無錫篆興學校獎孝友誅逆婦民鐫其懿蹟於石以誌思後補任南康府視民如子以老致仕民咸愛戴不忘

俱同上

譚大寧字彥貞高明人萬厯乙酉與弟邦傑同鄉舉事嫡母如所生每以氣節相砥初爲廣西太平司李思明士目陸會橫甚他司李率茹其饋大寧至酋密獻千金正色却之廉得其不軌狀白監司兩臺縛之正法思明以安事聞轉南曹郎所居官舍止一衣篋不設緘鐫人皆得啟視之無長物也在太平時陀陵縣隘而荒大寧開田數十萬畝縣供以裕讞獄南刑曹爰書平反引情合律不可更移轉黎平太守未之官

而卒貧至不能殮祀鄉賢祠

廣西官續錄

邦傑字彥平立身行已

皆有矩度乙酉鄉薦授湖廣京山知縣臺使者以治狀薦行取北城兵馬司陞南京工部主事崇正癸酉請增本邑科舉

額十名

吳志

楊休字士美高明人宿學勵行登科後授永康縣尹未幾卒

劉寬字希尹高明人敦篤清致登科後旋卒

嚴孔章字道克高明人自幼嗜學篤行取與不苟應會試郡守餽金五十兩固不受

區大成字景望高明人自幼失怙事母至孝補邑弟子員好學敦行以禮持躬周急扶危橫逆不校以善訓族鄉閭咸倚仗焉

區金龍字雲從高明人性沉靜好讀書以選貢授賓州州判

時大飢流民載道分憲知其廉能委令督賑金龍設法以次就食公廩不足益以勸助所活甚眾陞大理府判管鹽井却羨人稱廉介以母老乞休居喪骨立嘗從區羅陽學能發心性之蘊遠近學者宗之

羅儀字于孕高明人性孝友醇篤善詩及駢體文爲韓熊兩縣宰所器重萬厯丁未歲貢任福建同安學訓導人稱端樸先生踰年卒于官囊空無措門人作扶義錄五本助百金扶襯哀送數里

俱同上

區配乾字健吾高明人家貧好學性孝友父晁卒于徐聞乾往扶柩暴風覆舟號泣抱柩飄泊一日夕始抵岸人以爲孝感所致萬厯壬子經魁任化州學正陞國子監學錄出爲九江府同知調知蓬州民有訟者分別曲直令其退思不事鞭

僕卒於官百姓號送數十里

縣志

譚大智字舜明高明人天性孝友守貧力學充郡增廣生教授生徒以脩脯供菽水親歿朝夕號泣哀毀踰節月朔望必衣冠而告爲知府戴燁優獎督學張邦翼以孝行旌事關風化皆力爲扶植族黨有孤幼撫恤若己子人咸德之

同上

何惟恕字養矩高明人力學能文生平慷慨自命義之所在雖破產不惜獎勵後進多所成就尤工書畫爲世所珍應泰昌恩貢授寧德丞恤民寬賦懲革傲俗民風一變遷浙衛叅軍拂衣還里歸裝惟方竹杖數株而已

吳志

區懷懿字凝初高明諸生母死泣血三年不茹葷不食稻不近妻妾哀毀骨立鄉閭以問邑令陳京璧匾曰孝敷賢呂

關捷先字子卿高明人性聰穎目過無遺由南海學舉天啟

辛酉鄉試崇正甲戌進士授江西上饒令丁艱服闋補吉安廬陵縣尹宜民善俗廬陵人生祀之陞吏部郎中

嚴耀初字啟元高明人警敏淹博孝敬事親義方教子且憫飢濟急人多德之天啟元年恩貢授郎官秩滿不仕

黎天相字吉夫高明人性孝友以歲貢授江西廣信府鉛山訓導督修鵞湖書院時土官僂國奇破城官民盡戮天相全家獲免陞隆安縣教諭

區懷瑞字啟圖高明人大相子少負大才不讀唐以後書都中賦秋雁詩爲趙相國志皋所賞舉天啟丁卯鄉試以文章節義自最未嘗輕履公庭郡守陸整慕其才聘輯府志精核大備爲郡良書授湖廣當陽縣值流寇殘破之餘力行撫字招集逃亡民始安堵興學校設義倉直指使者余公首薦未

幾以艱去後補直隸平山令流寇益肆不二年挂冠歸里以  
崇正學砥末流爲己任著有趨庭稿遊燕草遊滁草王陽稿  
琅玕集稿行於世

區懷年字叔永大相仲子幼而聰穎十歲能詩初年應恩選  
厯太學考通判職丙子入都候選以內艱回籍後授翰林院  
孔目歸以廢和撰述爲事有楚鄉亭石洞遊一嘯集擊筑吟  
燕抵旅言元超堂稿與伯兄懷瑞齊名

莫禦字擴如高明人登天啟丁卯鄉薦授山東清平縣尹飢  
民載道聲橐以活之流寇逼城禦力爲防守寇知有備引去  
後補太常典簿轉博士遷浙江道御史捐修鶴山徑路將平  
頭席船送入學宮爲春秋闈試費

嚴學思字心印高明人崇正辛未進士授北京行人司行人



分校丙子北闈鄉試轉南京工部武選司郎中提學武舉兩

主武場考卓有政聲選光祿寺正卿年八十卒

俱同上

黃邦鎮字迺康高明人慷慨有智畧崇正三年歲貢司訓雷州轉信宜教諭會縣令趙挺遷秩去有西賊數千犯境邦鎮

領兵督戰大敗之薦陞松滋縣

郡志

有平寇集醉翁集和督

學吳貞啟梅花詩傳世

吳志

王應貞字栢喬高明諸生甘貧力學品行端方教授於鄉師範嚴肅嘗暮行田野中遇婦人就問路不顧速步而行婦人躡至屢問皆不答時有見之者言其事人服其真君子焉長子訓克守其教性孝友事親出告反面財無私積尤善事後母得其歡心年六十餘居後母喪悲泣寢苦數月有族姪慮其年老卧地成病勸之歸榻訓答曰不可以老而廢禮父歿

婚娶二弟數十年不分爨財用與共兄弟友愛終身無忤俱享壽而終

黎士楚字蒲徵高明人守貧力學和以與人舉崇正丙子鄉

試淡薄自甘義不苟取丙戌山寇刼隔河虜士楚入寨勒贖

無以應通學重其品行助以公帑其感動於人如此

俱同上

麥而炫字章閣高明人由進士厯上海安肅知縣

明史陳子壯傳

嗜學博古工書尤長於詩恆以詩讞獄

縣志

上海城外有虎傷人

而炫禳以文而去嘆曰禳虎易禳人難也大吏惡之以糧務

謫檢校後補安肅令尋罷去居邑之太康山多以詩紀事曰

太康集甲申國變廷臣隨風降賊而炫勃然曰國家三百年

養士固如此哉手拊床拳皮盡裂

謝鳴阜撰傳

唐王時擢御史

明史

我朝順治三年明永明王由榔至肇慶自立唐王弟聿鏤

立於廣州 大兵入廣州聿鏘被執由榔走桂林故庶吉士

張家玉貢生陳邦彥東閣大學士陳子壯俱起兵謀襲廣結

故指揮使楊可觀等爲內應事洩可觀死子壯駐羊城驛爲

大兵擊敗還九江村

汪由典史外

而炫復破高明

明史

殺知縣徐

中炫教諭魯廳以故主事朱實蓮攝縣事迎子壯

史外

子壯遣

而炫攻新興爲援兵邀擊環以勁弩欲生致之而炫孤軍且

戰且走至東安道勢益急謂其徒曰吾力竭矣爲我語陳公

後事悉相附他日倘拔一城一邑幸酌我一杯酒遂被執至

廣州不屈死

謝鳴皋撰傳

新興生員梁州垣耆民梁州翰與而炫

合謀皆死之

新興志

先是

王師將至一巡檢馳以狗窰令棄

城走僉曰非公志也城陷死者一千七百餘人乾隆四十

年 詔錄遺忠仍而炫監軍御史銜加諡烈愍祀忠義祠節

諸臣區懷炁高明人司徒大倫子天啟副車紫髯少負氣節

與而炫同被害藏血衣於南蓬山至今區氏子孫有掃其墳

者輒病疫死云

採訪

楊從堯字仲郎高明人性雋穎年十五以學行知名工詩賦

尤精楷書崇正壬午歲貢著有夢花窗集

吳志

程本字孟中高明人以歲貢授廣德州判性慈祥每笞人輒

惻然人稱程佛子會境內蝗州守以下無策本出令曰捕蝗

升者予粟升捕蝗斗者予粟斗民爭捕之三日而盡遂有年

嘗獲賊首守欲分功悉歸之不較也涂相謫廣德甚重之及

相爲僉事兵備嶺西使人存問本報謝請所言本日特特來

言無他也至今人以爲謹初抵任有以金帛獻者本却之邑

人欲屠牛奉金五百爲本壽不納秩滿歸圖書數卷而已

通都

李順字藹侯高明人事親性孝友兄弟向無分爨弟殷箠仕  
崇仁順力勸其歸養親沒居別舍三年不與聲色輕財好施  
正氣服物卒年九十四時稱篤厚君子

吳志

李文璧字圖菴高明人敦本務學由歲貢任平南訓導時譽  
歸之秩滿鄉居與族黨講學胥相勉勵兩舉鄉飲大賓

楊維福字較兩高明人爲諸生四十年足不履公門端方正  
直鄉里有不平者胥質成之治葩經以歲貢授瓊山訓導登

順治庚子科鄉試

謝振宗字占熊高明人性恬淡事親以孝謹聞應天啟元年  
恩貢爲相國周嘉謨器重薦授郎官秩滿歸布衣蔬食數十  
年不出人以高尙稱之卒年八十五

譚相國字起臣高明人崇正己卯經魁性孝友博通羣籍以五經教授生徒

區光表字炳茲高明人聰敏力學尤善事後母家素貧常以廩餼供菽水崇正壬午歲貢授貴州鎮遠合遷雲南廣西府判課耕寬刑訟獄衰息調煩楚雄府尋署霑益州具有循聲

俱同上

唐華字宗實恩平人時邑方草昧士鮮向學華以鄉秀選補弟子員首明正學爲諸生倡性孝友煥聲利正德間以歲貢訓邵武明教武士郡多賢豪每折節下之湛文簡曰爲篤實君子歸後仍講學不倦諸名士多出其門俸金置祭田不爲子孫地卒祀鄉賢

縣志

鄭履祥字旋禮恩平人嘉靖間父死於賊履祥奮身抵賊壘

執二魁磔之以告父墓間帥俞大猷聞其勇招以爲義從得功皆歸幕府履祥猿臂善射討壁山賊自當一隊殺獲甚衆有余百戶者陷於淖幾被獲祥掀之出百戶感父事之是時縣之清潭角新寧之懷寧苦村諸賊皆畏憚之不敢肆兵備李材治兵嶺西履祥時年六十餘矣召見之抵掌談兵猶勃勃也死之日路人若見其策馬張弧而去

莫如士字子元恩平人以龍驤衛籍領順天鄉薦登嘉靖丁未進士第歷官監察御史性端直敢言知張岳翁萬達有用世才疏薦之後俱以功名顯時咸寧侯仇鸞通賊如士劾之鸞欲中以危禍會鸞病卒如士又偕臺省諸臣追暴其罪上震怒命發棺暴尸梟首傳示九邊如士直聲震海內遷大理寺丞理冤恤滯人以爲有于公風焉弟如爵甲辰進士監察

御史如善庚戌進士歷官按察使

莫如善字子明恩平人父凝以軍功至京師授錦衣衛總旗遂隸衛籍少孤訓於母壯從湛文簡講學文簡重之嘆曰吾道有人矣嘉靖甲午領順天鄉薦庚戌成進士授戶部主事督臨清鈔關以廉稱陞員外郎知兗州府事歷陞四川兵備雲南叅政福建按察使所至有政聲如平莫坡安反側清礦課革鹽弊理冤獄其最著者歸閉門著書有代藝賢已稿三教會編正紀文集等書藏於家

鄭文字孔魁恩平人弱冠任俠中年刻志砥行喜赴人急難故人蘇元吉貧鬻子於商文知之追償商銀而還吉子嘉靖癸丑歲飢出粟百斛助賑邑城圯盜且乘之復捐金市甕完堞三十丈民賴以安幼弟經出爲叔後叔廢業經無以爲家



文割父業與之無怙色女弟無子代置祭田與繼室子供其  
祀至老行誼益著

唐賓字廷敬恩平人華之子也幼聞道學之訓以敬爲本以  
靜爲用歷寒暑不爐不扇衣冠讀易終日卽造次馳驅間未  
嘗頃刻離每稱邵康節真我師也自壯至老對夫婦如見大  
賓

唐淳字堯卿恩平人司訓零陵補德興擢北流教諭所至得  
士心性淡泊齋盤苜蓿晏如也

陳元樸恩平人字中粹生平以禮自持由貢任宜山訓導補  
福建福州訓導俱以賢著陞瓊山教諭巡道姚雅重之會澄  
邁洪丞者厚剝其民民不堪變從中起而聚賊遂乘機鼓煽  
姚以委元璞不旬日撫安之還揭承無狀丞與知府史里人

也求爲之地弗徇自是陳教官之名滿瓊海矣署澄邁父老  
郊迎舉手加額曰陳公生我未幾復有樂會之署會海寇吳  
平亂文昌會同悉破犯而獨不敢犯樂會曰陳老在彼無輕  
觸也兩視縣篆一物不持苟可利百姓不遺餘力歸林泉吟  
嘯自適對客蔬鹽晏如也壽九十人以爲德徵

馮遂字陽亭恩平人敏而靜爲諸生時裋衣矩步不苟言笑  
友人吳璜者掠於盜急贖之林安民貢居遂後親老欲得先  
而未敢言遂察知之竟讓焉以貢訓漳州嚴訓課恤貧士士  
胥慕悅歸後日與二三父老奕咏林泉優游卒歲足不入城  
以壽終

梁以綸字紹文恩平人生有異質甫弱齡父爲賊所害以綸  
匍匐購屍歸葬詣縣請討賊哭不絕聲縣許之竟滅賊其伯

父右崖以人命被誣繫於獄以絢陳說御史臺故法獄既具弗變御史異之遂直崖中年補邑弟子員端嚴雅博不輕言諾隆慶丁卯颶風爲虐萬厯丁亥蟲殺稼以絢前後輸粟五百石佐公家賑活數百人御史蔡督府吳義而旌之學博車建尊經閣以絢捐資爲倡邑令蔡標嘉其爲人賓以賓禮張斗南字柄夫恩平人由歲薦任河南信陽州訓導士皆愛慕性坦易而行誼修明方爲諸生時督學姚陳二公先後至檄諸生有行誼者旌之皆以斗南應匾其戶曰孝子邑令沈兼每過其廬必式之而斗南未嘗一私謁也

鄭坤元字寧一恩平人少聰敏一目輒成誦十五補弟子員性溫醇敦名行事繼母以孝稱弟貧割已資與之選貢訓廣州端州大有師範有吳生不顯者貧無以爲家資給之且引

喻以廣其志督學支可大一見輒擊節嘆賞謂不意冷局中見此氷操也兩載卒於任藁無餘貲諸弟子歸其櫬

鄭國一字惟超恩平人父文以布衣具六行院道屢旌焉國一行誼淳懿淵源有自兼工詩文起明經司教潯陽六年大得士心署湖口縣篆值稅珰橫暴之後力爲綏輯當道物色將大用之輒引病歸諸生爲立去思碑著有薄遊草

府志

吳濟之字裕恩恩平人資性超異起明經授岷縣令多異政有爭訟數年不息者片言喻之立解後擢雲南維摩知州岷民扳留不得勒碑以志遺愛性樂閑曠解組歸隱其沒也大司馬喻安性爲之狀行人謝雲虬爲之銘

鄭奎光字念星恩平人坤元子力學礪行閨門肅整以歲薦司鐸韶州有以陋規進者悉謝絕之或謂之曰脩儀天下通

例奚爲不取答曰先人以清白傳家不敢違也韶之士薰其德翕然不變焉晚年歸老操修不倦邑令宋應昇雅重之譚虬字玉霄恩平貢生開平人少孤竭力事母及長篤學嗜古由萬厯間選貢廷試第二授廣西平樂府恭城知縣時方洊飢虬捐俸倡賑民賴以生又奸民以邪術惑眾虬悉置之法閭井乂安立祠奉祀陞貴州麻哈知州甫履任辭歸教授生徒樂道自娛時方議建縣可以弭亂虬首倡曰縣成我盡捐所居之宅以爲公署今開平縣衙皆虬宅也

梁維棟字完太恩平人倜儻負雋才所交皆知名士時多寇亂慨然有經世志李公材僑兵嶺西維棟以書生入謁抵掌論討賊事李深器重之以貢佐同州兩視州篆政績大著將不次擢遽謝病歸以壽終生平著作極多皆不傳惟宋志原

稿猶出其手

梁銓字體性恩平人以貢令盧溪絕苞苴謝私謁以德化民民皆孚悅性恬退以憂歸遂不復出杜門却軌邑令宋應昇

重之

俱同上

龐尙鴻字少襄廣寧人都御史尙鵬之弟也起家廣寧貢籍入都卽上書政府發賑授鹽城司訓尋擢英山令上安邊治河諸疏奉檄治淮河漸次底績值巡撫巡河議不合移怒於鴻謫西安學教諭遷上海尉復委濬吳淞江不避權貴江道復舊轉崑山丞疏劾輔臣不報遂辭歸自策名至解組章疏及臺閣書凡十數上皆匡時要畧時論偉之

吳志

陳道同廣寧人永樂丙戌進士任浙江道監察御史性恬淡

寵辱不驚操履無愧所至有聲祀鄉賢

同上

蘇忠廣寧人志行端方善詞詠以布衣爲士大夫所矜式

縣志

黃約廣寧人性恬淡不染世味居鄉恂恂讀書務窺要領教授閭閻嘗曰學問無當身心猶說鈴耳宣德己酉薦於鄉家貧披褐蔬食晏如也

同上

梁維梓廣寧人幼孤母林氏訓之博極羣書工詞賦以明經授漳州別駕詰盜祛蠹肅法惟謹所至民立碑頌功居鄉構五柳堂以自娛有善性編瑤溪文集行於世

吳志

李大奈廣寧人萬厯丙申薦四會明經性孝友篤於行誼居喪未嘗嬉笑平居無疾言遽色與人交皆得歡心嘗讀小學

曰我輩學問只以內行爲基此處一缺無所不缺矣

同上

周達仁字兼宇廣寧人崇正二年歲貢行誼端方有約旨格言諸書行世其室中有聯云斗室清安居地濶寸心寧極得

天多輿論推舉之詞曰孝友性成風俗賴以式化詩書望重

後學奉爲師型入祀鄉賢

縣志

周裕延字待旃廣寧人登鄉薦任山東茌平縣知縣吏治精明士民愛戴陞行人司行人所著有荏山草四書一首六書

攷等書

高鵬廣寧人天性孝友爲武舉三十餘年非飲射讀法未嘗

履公門生平絕無爭訟其醇厚之風可爲鄉族矜式

年次無考

楊元美廣寧人由歲貢任普寧訓導操履方正恬淡寡言非

禮相干概不與校士林重之

年次無考俱同上  
縣志列入國朝

按

梁臨字彥良開平人少從羅蒙正遊工詩文蒙正亟稱之元

至正探花及第明初棄官復從諸生應舉洪武三年庚戌登

賢書明年成進士殿試第四人賜宴中書堂賦詩有鼓腹愧



蒙天澤溥願推餘滴遍蒸民之句一時翕然傳誦仕河南永

城縣丞以廉平績最起擢禮部卒有詩文集十卷

吳志

張天統開平人以明經司訓遙州以賢著擢雲南維摩州知州解組家居惟以琴書自樂監司守令皆敬仰之三舉鄉賓其生養死葬一依古禮尤不惑於青烏禍福之說臨終囑其子以地之澆瘠者爲己墓曰子孫愚世守之子孫賢知吾先人清白傳家不于分外加毫末也

張紳字書紳號懷荆開平人父秋逕爲黎貞門人負才名常從幕府往征交趾反遊京省有交州行稿及金陵行稿藏于家早卒紳稍長見父遺書輒墮淚攻苦刻勵下帷十年尋以明經司訓應天府正統甲子領南閩鄉薦授湖廣浣江知縣興利革弊愛民禮士邑有巨憝交結勢要出入公庭爲武斷

人莫敢言前官多徇之紳至絕不與交及犯事紳叱之曰爾獨非吾民耶何爲不守吾法按其情撲殺之其子訟于上閭邑士民共白其事上官益嘉重焉紳性剛方清介不事逢迎有勸紳稍貶以自全者紳曰吾豈爲一官而受屈乎遂拂袖歸杜門讀書嘗講學梁金山下四方負笈從遊者數千計有司爲建書院居之弟紀頌景泰鄉薦子瑛登成化進士皆以廉能稱于世

梁繼灝字行素號澹齋開平人黎正高弟博學有行誼當時遊秣坡門者不少獨澹齋傳其學教授羅山下子弟有所矜式魯能吳韜鄺慈皆出其門子益景泰丙子鄉試第八知興業縣益子文歲貢衡山訓導所著有澹齋集十卷

吳韜開平人勤於舉業目不窺戶者十年景泰庚午以儒士

入試中式粵東儒士中式自韜始

俱同上

張紀字振紀開平人三歲失怙從兄紳讀父書閉戶十年博通經史爲文千言立就領景泰癸酉鄉薦天順丁丑庚辰兩中乙榜一時所與交者皆海內名士羣推士林祭酒爲人豪岸身長六尺性溫雅而行直方且善筆劄咸化初命草武臣誥命稱旨特拜南京監察御史未到官而卒年四十四知紀者咸以詩哭之

志略

梁惠字宗澤號鶴洲開平人景泰丙子以書經舉于鄉任廣西梧州府教授署蒼梧縣令天順七年遭大藤賊之變解組歸行李蕭然餘俸不滿十二兩益以釋褐時所得鶴頂易田一坵曰白鶴洲因自號鶴洲孝宗卽位舉行鄉飲酒禮邑令聘公出公以詩却之曰七十年來德未加每勞賢者到山家

忙來汲水無茶煮感得鄰家有酒賒入饌拳鷄纔脫母作羹  
野菜尙含花歸與若對琴堂說人在長江理釣槎年七十二  
卒

余諒字以貞開平人父復永樂初征交趾民餽運者多道斃  
時叔當行復請身代卒無恙歸人多稱之諒登天順甲申進  
士以丰度端凝特授南京御史三署都察院事奏革御厨天  
鵝等諸異品畿民德之晉福建按察僉事革屯糧歲例千餘  
金所部使民如禮晉湖廣副使居官十有八年清操如一日  
迨歸悉讓故業諸兄弟姪自居蘇溪春風和氣于物無競與  
邱濬校議家禮節序行于世崇祀鄉賢

羅素字文之開平人別號豫齋爲學以主靜爲宗天順己卯  
舉于鄉銓試第一授廣西梧州府同知佐郡有循聲都御史

柳陽朱公淵器重之鬱林寇亂命監軍往征親冒矢石獲巨  
魁時株連甚衆同事議欲並剿素力爭存活男婦數百人陞  
雲南尋甸府知府潔已愛民及歸鄉居杜門却掃樂道自娛  
何述字宗道開平人少穎悟有志正學以名節自勵與陳獻  
章友善天順壬午鄉試第二人教諭容縣教授柳州造就有  
方士類德之聘分考江西有以重金求入彀者述正色斥之  
曰天地鬼神其可欺乎及歸構室山旁日進諸生講學不輟  
陳獻章過訪顏其堂曰斯文卒之日獻章爲文祭之所著有  
性理膚說四卷漁樵子漫稿二卷

陳經綸字汝學開平人陳元輔裔孫也少穎弱冠領成化  
癸卯鄉薦第一登丁未進士第三人觀政禮部纂修成化實  
錄奉使廣西暇日與士子講易一時翕然從之尋授南京戶

部主事獨持風裁以忤權貴謫象州同知至則撫定猺民修學勸耕不遺餘力撫按交薦尋卒於官著有寒泉遺稿六卷余統字承之開平人成化丙戌進士授行人擢南京監察御史上疏乞均用才以勵官守抑奔競以通選法糶陳糧以便軍餉併殘伍以省冗費禁宿弊以革吏奸修國學以崇文教侃侃數千言皆切時政官京師時有奉使者寄孥而行統避居僧舍俟其使還乃偕入其操持類如此年五十四卒於官

### 崇祀新會鄉賢

李興字叔起開平人由成化辛卯舉人知福建長泰縣賊溫文進倡亂悉心備禦民賴以安丁憂起服補博白縣善撫流民人多稱之子德治孫道長皆領鄉薦

李文明字朝光開平人宏治戊午舉人初任湖廣衡州通判

有運糧領兵築城賑饑之功時朝廷有事乾清宮文明督運材木所支有羨餘銀四百餘金悉歸之部以憂去補判湖松兩府理徭賦以清介聞遷福建寧同知居官三載臺院敬禮之以疾致仕卒年八十一所著有剩語二卷

余敬字行簡開平人宏治庚戌進士宰湖廣潯浦縣修學築城訟清盜息徵拜南京監察御史嘗因天變奉詔陳言乞黜不職全貴戚紓民困清戎伍省輪運節國用罷不急凡七事立朝侃侃有汲長孺之風丁憂歸遇雲南副使歸善姚祥謫官道卒敬殯之而歸其喪及服闋以病不行卒於家倫以訓表其墓崇祀廣州鄉賢

張璧光字純卿開平人嘗從陳獻章遊領宏治甲子鄉薦母黃氏年九十二每食必親供少至老無怠容初知浙江慈谿

縣俗多溺女璧光立保甲嚴禁之所活甚眾再知廣西懷集縣政務勤民城池橋梁以次修理省費寬民民德之暨歸屢舉鄉飲大賓年八十一卒

關中開平人宏治十八年貢生少遊陳白沙之門傳其學務于主靜而能出之以正凡持身教人一以端嚴爲宗由湖廣宜章訓導仕至按察司副使

俱同上

馮殷字質夫開平人宏治己酉鄉薦遊白沙之門學以主靜爲宗究心濂洛遺書得其大旨蓋白沙嘗云靜中養出端倪殷受其學故純正若此

吳志

李江字朝宗開平人訥於言而樸於貌重厚有餘而詩文敏速華美堅義精確不可易傾宏治壬子鄉薦任梧州府推官猗人梗化江親撫綏翁然革面後以文章忤當道罷歸未任



時嘗與羅素馮殷讀書薛公巖有梅花百咏及亦山等集  
倫大禮開平人爲名諸生慕白沙之學篤志探索其學期內  
得於心而見諸行事嚴義利之辨人皆稱爲醇儒

李逢年開平人暑年補邑庠至孝母病癰朝夕侍藥膿血悉  
爲親吮從弟貧弱不能食力爲之舉火族屬不能婚葬者出  
館穀助之里族咸化其德

俱同上

楊景辰字元拱開平人事繼母莫氏鄧氏盡孝設祭田伯兄  
元彰哀姪及姪孫貧予田贍之有侵其業者置不問足不及  
公庭遇饑卽賑之人有急卽資助之子瑞鵬亦能世守其義  
卒年八十四林聯綬爲之行狀

縣志

許相字廷翰開平人由正德丙子鄉薦教諭建安日進諸生  
講明六經及秦漢古文從之遊者多所成就年四十八卒于

官子炯自有傳

鄺達禮字用和開平縣人廩生性慷慨任俠傾貲破產弗吝也嘉靖壬午西山盜起友人何仲賢被擄達禮聞之曰士爲知己者死吾何忍坐視不救乎遂罄其所有持詣賊求贖適官兵至賊以爲閒謀戕焉督學魏校兵備王大用爲文祭之督學田汝成勒石於孝友坊

司徒綬號龜嶺開平人年十三補弟子員由貢生任乳源新寧教諭福建泉州府教授嘉靖戊戌年時議削聖爵綬憤然爭辨義形於色欲附議入奏章雖未達衆論韙之爲教敦本尙實務切身心輕財重義諸生貧者捐俸周之陞任宜興縣遷桃源縣知縣卒

許培之字曼植號圭屏開平縣人性溫厚領嘉靖壬子鄉薦

授福建永安知縣會兵戎饑饉邑地分割于大田寧洋戶籍  
空虛富豪占射培之摧梗招亡嚴清審察市井安集田里謳  
歌晉興化通判建倉便輸有平海倉儲德政碑署莆田築裡  
海堤成田數百頃祀名宦再晉廣西養利州牧政聲益著以  
親老辭歸子鉉時甲午舉人

張鴻字允彬開平人領萬厯庚子鄉薦司教茂名常集多士  
於庭談經課藝孜孜不倦受聘分考閩闈所薦盡知名士超  
陞浙江嘉湖總捕丁艱歸屢徵不起所著有四書講說及詩

集行世

俱同上

許炯開平人相之子十歲不知書忽大病恍惚遊名山遇偉  
人叩炯宿學若有憶焉旣愈視諸書讀若素習下筆驚人時  
目爲神童余給諫妻以女亦知書能詩年十九由儒士舉於

鄉上書當事言利弊文義竝美嘗修邑志及厓山志所著有

吾野漫筆余氏有篋中集

吳志

何熊貞號騰虛開平人萬厯癸丑進士厯官雲南副使潔已率屬冰檠自持士民愛戴所在皆有政聲遺稿行世

同上

陳璣字禮璇開平人天啟甲子舉人崇正甲戌授福建順昌知縣蒞任三載潔已愛民善讞獄曾脫無辜五人于大辟抵土豪罪有富民爲豪紳誣貸千金璣察其僞取券焚之民大悅時值亢旱盡捐俸金賑濟復會酌平糶救活數萬家沈撫軍具疏特薦丁艱回籍服闋不仕壽八十三卒家貧郡守劉士芳爲之殯殮

縣志

勞士傑字學狄開平人性耿介有志節弱冠補新寧博士弟子員習春秋以爲褒貶者聖人所以綱維天地也每讀至忠

臣義士輒慷慨擊節流連不釋及聞燕都闖逆之變拊膺大慟曰國家養士數百年欲得一日緩急用耳今誤國一至於此吾讀聖賢書何忍偷生閉戶自經其母救甦曰稍延殘喘者爲親故也自是佯狂自廢未幾卒年三十有四同上

馮人秀鶴山人洪武初佐新會劉令條築古勞基園後人念其功德附其主於劉祠祀之縣志

馮宇志鶴山人諸生淹通經史有濟世才正統時西潦爲災赴部請築基園准行後卒於京遂葬於南京鳳凰山錦屏峯

下吳志

李渭字長源鶴山人少以戶役爲縣令所辱遂發憤下帷不設枕席者三年登成化甲辰進士與梁儲同時時謂梁儲筆李渭腹授鳳陽府判官決淹獄如流妖僧霍同兒以邪術惑

厥將爲亂渭檣而杖之言笑自若渭硃書其名於背始呼號  
乞免乃械繫送獄及夜狂風驟作屋宇震撼渭知僧所爲杖  
劍率健兒抵獄則桎梏已脫矣厲聲叱之搜左脇有妖書墮  
地立取焚之斃之杖下僧將死始曰邪不勝正術悞吾矣其  
黨聞之皆竄匿解散渭亦不問一郡始安鄭府紀善王澤作  
過惡傳詳其事仕終淮安府同知

同上

施用字以政鶴山人少穎悟不羣性嗜學父故遺腹子也大  
母惜之令毋攻苦乃甕其燈候大母寢而後讀之值寒以冰  
加足令冷氣逼體使不得寐嘗遊陳白沙之門淹綜羣籍領  
宏治壬子鄉薦第二授南京太平縣知縣著廉能聲嘗減解  
戶以恤民力革迎神以淑民心有兄弟訟爭產者不問賦詩  
示之相與感泣而去當事者交檄薦之以不得郡守意議左

遷歸田里百姓扶老挈幼遮道而留縉紳祖帳泣別家業蕭條猶好施與友人林挺之貧月給資糧友死餽問不輟邑宰重之時備顧問忝築城之議築別業南溪畔以吟咏自娛與白沙相唱和卒年七十五子應岳以文學世其家

縣志

劉文瑞字廷麟鶴山人正德辛未進士授行人奉使占城賜

一品服事竣擢刑科給事中時帝好巡幸文瑞抗疏請回鑾

不報正德十五年陞授湖廣僉事後抵家卒文瑞樸厚慷慨

不計贏乏卒之日殮葬不給鄉人助之入祀鄉賢

吳志

楊英字廷傑鶴山人少以孝稱父喪三年不出戶景泰癸酉

領鄉薦母林氏有目疾英日焚香祝天比母初度目復明相

持悲喜拜天之賜遂一意奉養不復出仕暇則與門人講學

賦詩鄰有兄弟訟捐金求勝者英諭以手足誼卽引悔罷訟

人有貸權子母錢者歿謹遺一子其妻思鬻子以償而不忍  
英捐錢贖券焚之仍給以粟及母卒哀慕如禮喪畢竟不出

祖鄉賢

鶴山志

易之教字湛許號震亭鶴山人以儒士補諸生既乃謝去從  
湛若水遊得隨處體認天理語終身自勅執父喪哀毀骨立  
時祖父已耄目障乃忍死日謀奉甘旨不倚諸父既而母病  
日夜不解衣叩天密禱願以身代弟子從之遊者必先繩之  
禮而後訓以詩書多成立孫文炳以髫年舉於鄉則引溫公  
少年登科語戒令閉門卒業無與外事曰汝曹稍不自勅他  
日負朝廷蒼生何以爲士先塋嘗田被侵涕泣以請其人悔  
過還之後書座右曰存光明正大之心爲光明正大之事里  
居大書孝弟忠信禮義廉恥善可法惡可戒諸字於櫺亭鄉



里化之年七十九臨卒語子孫曰忠孝立身之本清慎居官之本勤儉持家之本寬厚處世之本所著有景賢錄輝蟬集各一卷

縣志

羅兆鵬字少南號裕庵鶴山人嘉靖己酉舉人選長樂縣教諭起廩裁競士習以正擢知長泰縣丰裁凜凜科則有規修良岡書院日課羣士埔邊塘田爲要官所敎民屢訴不決鵬舉而歸之民寧洋盜區首議建城身任其勞遂成巖邑督府汪道昆譚綸直指李邦珍陳萬言薦諸朝加秩移治寧洋而向之要官讒之遂罷歸二邑各立祠祀之歸後聞里有臣女勝武臣家厚贖而歸其母女後爲貴顯婦所著有滄溟一螺集家禮註補

縣志

容瑞字廷桂鶴山人性質魯早失怙每奉遺物輒泣不已適

盜火其居惟遺物幸存其孝感如此事母梁志養尤篤由歲貢至京以母老陳情終養母喪復入南監祭酒費家尙書湛若水交薦嘉靖初廣東布政使李中以聞詔旌其門後任遂

昌主簿

吳志

勞守謙字光仲號荆庵鶴山人父文益嘗還人遺金生守謙少穎悟甫弱冠登嘉靖辛酉鄉薦尋以親老祿仕得桂陽學正率學者以身惠貧士以俸萬厯癸酉聘雲南同考御史舒念亭察其行履附疏薦擢知廣西藤縣丁內艱起補馬平縣勤政恤民爲武弁中傷歸有族人盜賣嘗田者獨力贖還供祭遇橫逆每引咎不校應雲南同考官時得御賜金貯之每歲糴穀以防里中饑立家塾令子大臨訓里中兒不入束脩所著有四書五經鈞元錄修德會寶錄貽穀碎言等書弟守

謨亦以學行知名

縣志

容瀚字約夫鶴山人七歲喪母旦暮泣血八歲卽能順事繼母兄常恃才使酒瀚結書屋避之後補諸生卽負笈從湛若水遊歸復從縣尹何廷仁講學推田讓姪養嫂親喪及修祖墓皆獨力任之復送己地擴公宇不受縣值縣尹林騰蛟知其賢欲以耳目寄之瀚謝曰久已杜門莫知外事安敢以風聞誤賢明遂不復見屢舉賓筵不赴壽八十卒

同上

古天祐鶴山人力學篤行家貧自得少與增城湛甘泉友善後甘泉貴顯嘗過訪祐布衣木屐相見甘泉欲爲祐營室祐辭弗許僅以木數椽建小室於山下砌石爲臺以資吟咏甘泉每至室中觀其所爲無不歎賞所著詩詞甚多不甚愛惜故不傳

吳志

吳應鴻字鳴漸新會人

今縣

攻苦力學萬厯十年壬午舉於

鄉戊戌授松江倅同銓有掣梧州者

應鴻舉以相易太宰大

喙曰松故名郡若舍而就梧何也鴻告以母老太宰辣然聽

之梧故有權務主者多私奸胥藉以侵漁鴻一蒞宿弊巨憝

邱大用與胥徒相倚爲奸飛而擇食又工妖術眯人或縱淫

穢爲梧劇患應鴻廉得卽麗之法或怵之正色曰安有除民

害而畏禍者卒按以死尸諸徭郡有墉之役役者掄土范磚

未就陶而大雨土釋不可火費公家金錢無算當事者泥文

法相踵待斃應鴻爲設法釋之狼兵歲冒餉不貲應鴻立分

調法逐隊查點虛冒爲之一清攝北流邑幕故墨甚餽以金

立召還之幕懼解去以母喪歸適鑑稅事起內侍充使分道

四出使廣者爲李鳳肆爲橫奪又陰籍富人懦弱者中以匿

稅法淫刑以逞邑令鈕應魁媚事鳳與其黨結指使分肥繫

良民四十餘家百姓赴架壘新會志應鴻以群情洶洶恐生

他變偕萬厯丁酉同邑孝廉梁斗輝鍾聲朝勞養魁今皆爲鶴山人

謁鈕備述百姓搶攘狀披瀝諄切鈕拂然入逼勒愈急闔邑

知孽由令作益惶惶無措呼吸間民麕至無慮數千充牣縣

庭哀鳴痛哭鈕不爲動旋索械召兵一時奔逸爭鬪蹂踐死

者五十一人撫按聞變方擬繕疏鈕竟誣譖於鳳以撓稅馳

疏先入緹騎立至逮應鴻焚香告祖青衫皂帽與三孝廉受

械而行見者皆哭抵京就訊應鴻抗辯不屈俱下詔獄時政

府部科鳴冤之牘不下數十俱留中不報應鴻竟卒獄中後

鴻子舉人思友詣闕陳情太常郭尙賓侍御吳其貴等相繼

請神宗悔悟詔贈應鴻尙寶寺卿同事舉人梁斗輝等皆准

覆試就選

嶺山志

工科給事中王德完訟寃疏曰臣惟廣東新會民變前已奉旨逮繫提問有差彼時臣未習粵事何敢妄言詢粵中來者皆云粵士何罪罪於縣官臣猶遲疑未信頃接廣東院司考語文冊內開新會縣知縣鈕應魁惟急羨餘常例不知束吏保民中使差官提提富戶多人極刑拷掠士民方切痛父母之呼本官漫爲秦越肥瘠之視以至百姪積怨生仇積仇生亂始則擁衆堂皇蹂踐而死者五十一人旣乃闖入衙舍狂瞽而罵者兩晝兩夜決百年法紀之防駭四方衆庶之聽禍本雖由中使激變實自縣官尤可恨者旣懼中使之勢而莫敢誰何復假中使之威而因以爲市蔓延士類逮繫無辜誰爲厲階臣可切齒臣讀罷不覺

髮上指冠恨不手刃以復匹夫匹婦之仇以息四民四方之念臣殆不能緘默無言矣夫守令何官親民之官也守令何任親民之任也當鷹鷂搏擊惟父母爲之救援盜賊猖狂賴乳保爲之捍蔽今應魁未事而漁獵於先因事而箠楚於後不消弭於衆怒水火之日顧請剿於黎民糜爛之秋畏威附勢正名教所不容乘變劫財尤犬豕所不欲殘民之惡已稔誣士之禍尤深訪得舉人勞應魁於萬厯二十七年十二月往省城娶婦離家計五月離城計四百里通判吳應鴻新以憂制回籍舉人鍾聲朝梁斗輝又皆窮約杜門激變原由毫無干涉查該縣初詳撫按司道則曰差官陳保流殃棍惡林權置禍再申則曰生員七人主盟亂民劉七星等鼓譟並無養魁四人姓名查稅監李鳳

知會手本亦曰拘犯李云易等十二名被生員聚譟與陳保揭報相同亦無養魁等四人姓名彌天巨網何故突入其中臣猶恐文揭難憑乃又經守道李同芳親至新會定亂廣詢士民訪求首惡無勞養魁四人細求其故僉謂養魁之父以鹽事激怒縣官訟在臬司未結向欲以奇禍中之又該縣自知傷死人眾民怨莫解託縣丞蔡道全登鄉官舉人之門求爲勸和而應鴻斗輝聲朝以眾怨難平不果遂嘆之初欲倩爲解脫繼乃詭揭中傷不惟殘害百姓且煽惑縉紳此宜提問重究以警海內者也

陸象賢字肖靜鶴山人少孤貧母蘇氏訪績教之弱冠食廩餼萬厯丙子舉於鄉任程鄉教諭晉福建松溪令明慎清勤邑有舊鑛令民開採調度有法民賴以安御史何熊祥稱其



真誠可貫金石清純不愧衮影比考滿制府移怒浩然而歸  
立規約以訓子姪設祭田以崇宗祀族屬有不足者隨力以  
濟環堵蕭然晏如也結社螺源日與高士吟咏所著有螺源  
社集

倫肇修字得昌號五知鶴山人長身玉立志趣超邁萬厯丁  
未成進士授武學教授日率勲衛子弟談經課藝後遷國子  
助教旋陞吏部考功郎中銓政一清巨璫魏忠賢方竊柄肇  
修不屑與周旋請假歸省尋推湖廣四川叅政不拜改尙寶  
卿遷光祿大理少卿以事抗魏璫削籍南歸崇正初起用逐  
臣補原任在廷侃侃獄立論斷明允里居時有庠生鍾巨器  
儒士湯顯武平民趙長子爲仇所誣幾陷大辟肇修亟爲申  
雪脫獄口不言德常設義倉以備饑置義塚以掩骸云

任六推鶴山人以行伍任千總萬厯間太監李敬奉命來廣開礦文行縣令查官銀報大戶招商人令一時失措以推父雲溪先年曾赴軍門呈承開礦不知實奸商冒名營求也遂喚與議推見父耄挺身見令言官銀無餘惟資大戶以濟因出里長所報大戶三十餘人欲揭榜示之推力阻曰都人近聞開礦畏累思逃若大戶之示一懸人盡奔散後將若何願承命招商以爲權宜計爰領帖承商招同伴三十五人合銀貳千伍百兩於牛腸坑白雲地施工越歲始得採沙其值僅敷工食而商本告竭且欠餉項七百餘金推丐李敬疏請停止欠餉槩予豁除各商得免賠累大戶得免開報皆推力也

吳馴鶴山人附城籍領天啟元年鄉薦性慷慨有濟世才在

都門嘗爲駙馬王昺草奏請練京兵上覽之嘉歎昺欲以名聞馴力辭歸鼎革後四壁蕭然甘貧自樂邑令劉象震見而重之歲饑餽之粟不受所著有野鳴集卒年八十三

任鳳翔字伯起鶴山人由南海諸生崇正乙亥選授明經任湖廣茶陵州甫下車烽烟四起力陳守禦之策與當事不合遂掛冠歸時鄉有劇盜肆虐鄉人莫與抗翔曰此輩若不剪除流毒無底密請於令謀而擒其首置諸法後以羣醜加忌爲盜所傷卒鄉人激憤獲謀傷者盡置典刑迄今鄉井晏然無伏戎之患者皆其力云

易奇際字開五鶴山人性孝有文行年十二侍母馮氏疾廢寢食者數月及喪哀毀骨立弱冠爲郡諸生舉崇正庚午科鄉試公車三上厯覽齊魯燕趙間與豪俊交意氣慷慨毅然

以大節自期庚辰復赴都上書論邊防諸務時禮部試事未畢忽夢父疾亟束裝歸時父卒已逾月人謂精誠所感服闋絕意公車講學授徒以克己爲要主靜爲宗爲文高邁卓越卒年六十三門人私諡曰文哲所著有逸紀拂劍草大易堂集三十餘卷仲子訓季子宏俱能詩有遺集俱同上

施應岳字粵賓由歲貢生授廣西潯州訓導遷古田教諭委攝縣事辭不就遷唐府教授薪水至不給王憐之付之券令收民間子母錢數十萬岳嘆曰馮煖何人尙爲公子市義岳以儒臣職藩教奈何以券使也王不應行子母錢臣義不應捺市井權悉歸其券後以艱免王不忍舍服闋三徵之岳以母疾固辭壽九十五

吳志

易鏞字用之鶴山人與易彬易允同從白沙先生遊鏞慕古

嗜學動以禮法自守癸酉邑令徐孔請赴賓筵賦詩辭謝曠情逸致山水自娛彬爲白沙高足彬死白沙輓以詩有八字銘旌吾敢愛知君不愧舊儒衣之句允好學不仕白沙名其齋曰隱求並贈以詩

易文炳字元星鶴山人幼從祖讀書不出戶年十三博通經史十九領鄉薦房考劉景范見其文以爲老成榜發則垂髫也益奇之後補陝西興安州未至聞寇警遂兼程而進督兵禦賊賊輒遁與民最苦起解藩王祿米又與華州代解炳下車首請於上起解得折色代解移復本州民甚快之未幾以母老歸養

縣志

馮一夔字堯章鶴山人年十三工詩賦父寬攜至南京官舍刑部尙書白公昂見而器重之命作遊春等賦千言立就人

皆以其才爲天來號天來子年十七卒鄉里咸惜之所著蘇

壤遺稿散佚過半

吳志

吳獻字呈偉又字幼更鶴山人籍隸新興由貢生中隆武乙

酉鄉試順治三年明永明王由榔自立於肇慶獻詣關陳策

旣乃偕順德陳邦彥散家產結鄉兵與東莞張家玉南海陳

子壯等互相援應授兵部左侍郎子壯敗走高明獻中流矢

傷城破易服遁大兵以刃脅其妻陸氏強索獻卒不言乘

間赴水死獻收殘敗還肇慶計募新兵初士寇掠靜村獻討

平之開平羅村有族匪隨賊官兵將屠其鄉獻請分別治保

全者數百家於是人多德獻會獻募兵遠近皆響應軍勢復

振晉兵部尙書七年大兵再至肇慶永明王走梧州奔南

寧部下謀縛獻請降獻覺逃去變姓名居龍江鄉人無識者

久之鬱死年四十有八子廷相廷柱俱隱

按鶴山志云獻事蹟載選田吳氏族譜以逃歸未死

故史傳不詳其事而鶴山舊志復諱之阮通志又訛

吳為呂伏讀我朝勝國殉節諸臣錄凡福唐魯桂

諸王同時殉節諸臣分別專論通論

聖主如天之度風厲臣節超越千古矣獻雖未死而

始終無玷其節不可沒錄之以補史傳之缺據此則

前府志無從采入非漏也

李質字文彬德慶人其先自祥符來徙吳志器度宏偉昂然負

高志博習經史必期明體以達諸用宋濂送刑部尚書李公除浙江行省參知政事

序元至正間行省左轄東莞何真知元運將燼為守備計辟

質叅機務德慶民何國賓張宗達倡亂真以兵遣質歸募鄉

兵二萬餘立堡柵於龍岡之上與陳文仲防禦時官舍民廬

焚毀殆盡守令將帥悉付印綬於質質亦挺身經畫遣其仲

子伯豫同文仲督募兵討諸賊平之上連蒼桐象郡下接三

山九江皆藉其保障黃通志尤好儒雅章縫之士多往依之其

最知名者江右伯顏子仲茶陵劉三吾建安張智吳志洪武元

年征南將軍廖永忠等下嶺南質封府庫詣轅門欵附何真

入覲高皇帝慰諭之十二月授質奉訓大夫中書省斷事大

記五年遷中順大夫刑部侍郎三月進嘉議大夫刑部尙書

山東饑遣質往賑賜以詩九月進中奉大夫浙江行省叅知

政事洪武三年惠績著聞帝念質老召還嘗入見便殿訪時政

質直言無隱拜靖江王右相王罪廢質竟坐死明史同著有

耕雲集子伯震舉懷才抱德科試大祀慶成賦及策論皆中



高等博學無所不通能爲詩歌初授容縣知縣永樂甲申改順天大興知縣蓋特恩也時方始建北京卓有勞績以父任

拜光祿寺丞

吳大記

李穆字文昭質之仲弟讀書談道不樂仕進尤有詩名與其兄質及姪伯震一時吟咏甚富時人合而鐫之題曰三李集

吳志

陳立字子綱德慶人曾祖文仲爲元萬戶父宗錫號樂靜爲撫猺舍率猺入貢因事之遼遂不返立七歲自知讀書旣壯告其母曰父去久音問不通若不訪求天地間一罪人也聚糧走燕趙書姓名情狀于衣背日詢訪之至開平中屯衛遇一父老攜至家出其父所著樂靜遺稿因獲葬所立齧指滴血而骸果入仰天大慟絕而復甦乃負骨以歸聞關者萬餘

里禮部侍郎陳璉作陳孝子傳祀鄉賢

黃通志

王制字宗義德慶人其先出自江西廬陵元末大父文政任廣東藩省使次子觀銘隨任悅粵風土居之入籍德慶制自幼警敏穎異五經子史過目成誦下筆數百言立就尤好左氏所爲文皆宗左國見者驚嘆爲詞林第一人弱冠補州庠弟子員永樂辛卯舉鄉試乙未登進士第授行人丁外艱歸執喪守禮州郡弔賻悉謝不受起復適邊報旁午上疏議馬政數事上優詔褒答同時諸名士如解縉夏元吉楊士奇噴噴嘆賞宣德己酉奉勅冊封蜀王動止有儀應對明爽燕賚一無所受王大喜作詩送之有玉潔冰清辭禮帛之句還至夔州南陀驛遇洪水暴湧舟覆溺死其遺骸不可得訃聞上

痛悼殊甚祀鄉賢

陳循撰傳畧

曹昌字德隆其先壽州人祖承宗德慶千戶父斌好遊往來  
汴洛許汝間久而不歸父去時昌甫三歲及長問其母曰吾  
父安在母告之故昌大憾後得父書知在河南遂平縣既娶  
婦生子以家事付其弟遂辭母去誓不見父不還乃趨河南  
之遂平得館人告之曰而父有妻子攜以歸久矣昌旁求不  
得困於途每夕稽首北辰願減算以見父行至裕州遇父友  
倫濟始知父已死矣訪遺孤得葬所朝夕號泣水漿不入口  
裕人憐之聞於周王賜孝子詩命長史潮陽鄭義傳其事負  
骸歸葬哀毀踰節人稱爲曹孝子祀鄉賢

吳志

王瑋字廷璧別號東谷明洪武初祖觀銘自廬陵僑居德慶  
家焉永樂乙未進士行人制其伯父也幼聰睿年十六補州  
庠生景泰庚午領鄉薦三上春官不第乃自分數奇就職初

授東陸縣訓導作人有方課士有程成化己亥改安溪縣教諭瑋至嚴加振刷作勤懲惰秋滿解組歸諸生祖送數百里外既歸築精舍誨訓子孫種竹栽花飲酒賦詩以適其志無事不輕至公府

梁崖王東谷傳

謝澤號商霖德慶人舉正統丁卯鄉試知龍南縣事重學校緩催科興利除害有元惡李源澤甫至卽鋤去之取其所占土田悉還原主賊首蔡玅先聚黨刦掠澤董修城垣民賴以安歸里恥入公門高要里排知澤與督府鄧公善挾數百金求刺東鄧取回田土澤却不顧

州志

鄉人稱貸凡二百金病篤

悉焚其券曰毋令子孫守而責之也

郭通志

陳衍德慶人在瀧水主簿成化元年西寇攻新興高要等處衍領官兵爲先鋒躬冒矢石死于陣時當五月經五日身體

不僵顏色如生人以爲忠義所感都憲韓雍命有司以少牢

祀之復立祠死所歲時致祭進士張瀾爲之傳

州志

張瀾字東之德慶人成化丁未進士歷官刑部郎中清介明  
慎貴戚之訟守正不撓居職廿載以病請歸行李蕭然始終

一節

吳志

徐璋德慶人登成化丙午鄉試任延平教授守明初制謁當  
道長揖不跪以正士習勤考課爲先旣歸絕跡公門古心猶  
不可及祀延平名宦

州志

梁東之字宗海德慶人舉宏治辛酉鄉試仕仙居令祖母溫  
病痢中裙廁踰身自浣滌兩月不懈初放榜下第者哭東之  
亦欷歔人問之曰幸得錄於主司而親不逮是以悲耳友於  
諸弟里人稱之卒年八十二

郡志

王朝臣德慶人宏治間貢少勵志嗜學與友張瀾弟朝賓反  
肩書室朝夕相與切劘以貢任廬州府訓導日聚諸生條析  
經義娓娓忘倦月考第其殿最堂饌之供悉捐俸爲之而餽  
遺弗受也旋以親老力求歸養義訓三子廷鳳廷祥廷元孫  
宗器俱成名祀廬州名宦

吳志

謝恩榮字天寵德慶人宏治間歲進士任長汀縣丞政尙寬  
恕民咸樂之正德己卯宸濠寇逆都御史王守仁起兵討之  
命榮率師以從榮卽進部下諭以討賊之義兵皆感激兼程  
而進大破寧賊守仁甚器之欲薦於朝榮以年老乞致汀之  
父老垂白攜幼送之江潯優遊林壑自號愛葵年八十餘卒  
張汝秀字子達德慶人正德間歲貢任澄邁教諭與物無忤  
爲諸生時其兄汝存州逋賦失亡多汝秀竭已分之沒齒無

怨撫姪如己子年八十卒

州志

劉揚德慶州人歲貢授永嘉訓導不受餽遺察諸生中不能養娶者量力給之居二年以寮友不合棄官行李蕭然不免稱貸征羅旁賊詣督府上書言時務多中督府禮遇

吳志

陳天華德慶人嘉靖初以貢充國子學生有氣節憤羅旁

賊肆毒當事者每假撫以餌之而害日熾乃疏於朝

郝通志

曰

臣州六十四里以寇故減三之一都城晉康一鄉罹西山羅

旁徭寇踞田府同知賀恕逼民賂糧二千石民益困苦民彭

堅父子三人同日縊死民陳本妻及女賣商人一子賣州學

訓導爲奴凡民以寇荒賂糧典鬻妻子屋產者難以枚數宏

治四年辛亥征東出南鄉甫兩越月徭寇幾斃不幸官兵速

退又令曰勿擒餘賊致賊得假喘息復縱奸民濟賊糧糗以

是賊益滋夏正德元年丙寅賊勢大肆都城巡檢牟智千戶  
林熙高謙庠生梁元錡千夫長嚴明黎瑾軍人陳亞瑤亡於  
寇及各商有盡船被戮者村寨有盡亡血刃者冤民籲訴守  
土之臣隱焉訴人反加刑杖由是百姓災害雖重冤苦雖深  
九重萬里誰能赴愬正德十四年己卯寇首鄭公厚韋公丙  
等僭號稱通天通地大王掠上峒等村殺人擄牛房舍毀燒  
官軍不能禦且從而招撫之十五年庚辰鄭公厚等越江構  
亂封川縣僮賊蒙公高等僭號剽平王賊徒三千劫封川縣  
殺擄三千人肇慶府知府王瑗同知徐鍾淮失機指揮張鼎  
勇敢死戰官司反曰鼎墜馬死千戶王謙達官馬襖數百命  
遭寇乃死俱隱蔽不以聞十六年辛巳賊劫金林上容峒殺  
擄男婦李慶等四百六十人劫悅城等鄉殺男婦孔宗生等



千餘人地方官無設謀勦捕者惟候寇退則派里甲辦花紅牛酒撫犒賊而已堂堂府州參養官軍不能退寇而又賞之

不可羞乎

舊州志

且條陳禦賊之策

郭通志

朝廷下其奏兵部兵

部移撫臣勘處撫臣下劄肇慶府知府曾直下劄德慶州知州陳忠納賄護賊曾直曰知州陳忠受命來牧乃縱賊黨惡舞文長奸無意於民與賊爲體豈朝廷命官之意吾民何望哉旣而都御史張嶺召天華叱曰若從爾言吾守土臣皆罪臣也嗾梧州同知汪儉招賊黨誣天華納賄株連其兄弟天榮皆謫戍貴州之永寧衛復嗾管解人殺之戍所其兒本義數千里負其骨歸葬少宰南海霍韜爲之傳知州陸舜臣書其事于石

州志

鄧牆字伯蕃德慶人以貢任高安丞溫良慈愛士民悅服嘗

主上供羨金數百不敢因而爲利富道賢之醉人遺金五十于其門次日倚門而望其人至卽舉以還未嘗啟也卒年九

十五

郭通志

梁崖號鶴洲全七世孫嘉靖歲貢任永嘉縣丞署縣事革弊習化頑民闔邑頌之及解組歸里憤猺賊猖獗與同邑陳大政及諸生等詣督府殷正茂請討諸賊郡乘湮沒蒐集合志重纂修之年八十三卒

州志

梁滔字東注德慶人嘉靖歲貢任永康丞廉介持正居鄉仗義疏財性善吟咏纂有古詩輯數卷

陳沛號瓊泉德慶人嘉靖間歲貢光祿大夫文仲孝子立之裔性勤敏好讀古書正大自持與物無忤其佐宛平江寧二縣俸資悉分弟姪戚友及歸尤好施與絕跡公庭有司多器

重焉卒年八十有一

謝球字貢夫德慶人少爲諸生博雅能文天性孝友居父喪三年獨苦枕衽側痛洩不輟人有與其父同庚者遇之不覺感愴流涕母染痢親視糞滌汚器朝夕進藥餌身不離牀第者累月父終弟光秋光積尙幼球殷勤撫育躬自訓誨一錢尺布不以歸私帑二弟賴以成立睦族厚隣仗義好施有死不能殮喪不能舉者皆捐資相助甚有稱貸以行之者甫膺歲薦嘆曰子欲養而親不在雖三公無補也遂不仕平居授生徒二十餘載諸生出其門者六七十人卒年六十三

陸世鍵號占齋德慶人隆慶間歲貢任莆田縣丞立志簡淡禮賢下士興利除害有功于民

陳守基字子雲嘉靖

年貢性和厚而疏財嘗代殯梁人舉

等三柩人稱其義厯惠州東陽蜀府三任博士嫻於訓迪諸生貧不能婚葬者量爲之助旣歸結菴南塘絕跡公門訓子聯第聯輝孫王烈俱成立

陸大成字希孔德慶人隆慶間貢初任惠來訓導大興士類當道賢之委護邑篆有訟者夜奉百金不受因聞臺院御史詹公曰處寒賸却夜金亦今之關西也特疏薦之擢知平樂縣廉介持正愛士恤民任六載去

戚大勳字次周德慶人少孤事母謹篤凡問寢視膳之禮至老不衰侍庶叔撫幼弟尤曲盡其道以貢訓瓊州歸善二庠咸有教聲入祀名宦里人因作宦海流芳詩一帙以識其盛州博陳日新爲之傳

歐萬顯德慶人由吏員任南安司獄囹圄有饑餓者悉捐俸

飯之太守汪某目爲善人委訪獄犯得久滯冤罪三人又雜犯十三人密呈由釋後犯覺致謝顯絲毫不染人咸稱之愿九載考滿致仕回籍卒年八十三

徐有爲字彥案德慶人童年登萬厯丙子鄉薦厯任臨安桐城繁昌三縣清介自持不避權貴奏最陞武岡州知州州屢遭寇害爲設策防禦民賴以安直指使者按部署之上考擢靖江王左長史比辭歸行李蕭然益勵名節

杜英字彥實號充寰德慶人秉性孝友博通經籍萬厯五年羅旁始平立西寧縣隨籍撥廩充附縣庠築城池建學宮與有勞焉至倡明禮義訓化士俗尤爲士民矜式首膺歲薦授肇慶府訓導轉恩平教諭多士德之

梁大同號念劬德慶人萬厯選貢任金谿縣丞禮賢恤民督

餉白下有功大司徒何駒牧薦于朝適訃音至大同卽奔喪

守禮遂不復仕著有四禮末論嘗輯州志

俱同上

劉大禮字少侶德慶人品行醇篤與弟大節勵志奮修總督韓公器之課文日就數千言鄉人薦入太學累試首拔初選寧國二尹立身峻潔却大盜之募金法治弗貰辭犯生之重賄律究無私惠威並著有古循吏風妻杜氏歲值隆冬憫縣民之無告與監犯之凍餒者親爲制衣調粥給之時人方之陶母上臺嘉其賢聞於朝擢遼東左衛經歷迨邊事起遂賦歸來築室鑿池於城東之野日與諸生講習其中鄉里稱先生焉有四子長勉另有傳其三人皆儒林鵠立克纘先緒

越縣

劉大禮傳

劉勉字銳騰別號青藜德慶人少侶子負才穎異童年累試

冠軍中萬厯壬子副榜登天啟元年恩選任上虞縣攝篆兩載潔已愛民倪元璐爲之傳州志

謝君言字道謨德慶人賦性冲和宏詞博學庠士半出其門膺萬厯四十八年歲薦厯河源瓊山二學博士賢聲丕著御史陳寶泰署之上考尋陞太平教諭辭歸田里徜徉山水以自樂人號樂菴先生同上

梁梓號星伯崇正十四年歲貢事母孝謹母患痢劇每旦叩天求以身代產業任弟先取嘗建言禁販糴以濟窮民凡遇婚喪未備者必罄囊以周人急屢經學道優賞州牧朱議沈給以匾曰忠孝文人劉晉康作墓誌以表之

梁普字繼初德慶人居金定讀書循理隱居自樂不求仕進居鄉訓徒二十餘年嘗修郡志祀鄉賢

蒙端封川人其先籍金陵元季避地居封之東廂童而岐嶷  
長而倜儻每有魁天下之志當革除際養晦桃源不求聞達  
靖難後親執勸就試領永樂甲午鄉薦中乙未副榜欽命冊  
封韓王見其丰儀禮度寵加優遇贈以詩堂堂天使威儀盛  
蕩蕩皇仁嫺睦深回首好傳華祝意宗臣長效向陽心一時  
縉紳榮之

吳志

李信封川人永樂乙酉鄉薦知交阯屬邑守法奉公人莫敢  
欺時交趾爲亂攻城信率衆堅守交人曰李公守義愛民勢  
不可奪遂護之出境

岑哲字永明封川人由歲貢知交阯唐安縣甫二年值交賊  
黎利叛攻城哲率民效死守之賊益衆城中食盡度不能全  
恐妻子爲賊所污悉令服毒死哲督兵出戰死之其子與姪



奔救亦死宣德二年成山侯王通與賊和約遂令收其骸骨歸

陳錠字國珍封川人性坦率嗜學爲文有根據正德癸酉領鄉薦任榮澤晉江教諭遷興化府教授師範端嚴待諸生以禮秩滿告致歸里未嘗輕跡城府持論好稱古人所著縣志惜不傳

蘇喬字子遷封川人幼有至性事父母惟謹補邑弟子員鄉黨以德行舉屢蒙學使旌異初司訓清流丁內艱服闋補漳平教條規約以孝弟爲先秩滿擢昌化教諭以父老歸養性好學手不釋卷作文刻燭而成所著有封川野志二卷卒年七十一

俱同上

蘇夢陽字伯乾封川人初司訓潮陽稱善教兼有經濟才直

指李疏特薦擢滇之祿豐令居二年緬酋倡亂攻陷武定府旁及諸邑夢陽誓死守縣故無城賊鋒甚熾度勢難保經略帑藏解印屬家督萬民選騎卒護馳上當路者詰旦爲巳酉元日賊至遂率兵出戰手斬三級兵寡力困竟被執賊脅以拜曰我漢官豈肯屈賊索以金免曰我義士何惜一死罵愈厲賊愈怒懸竿首加矢焉身嬰百箭至氣絕罵聲乃歇而臺使上其狀詔贈光祿寺少卿廕一子入監

縣志

楊賢字思齊封川人成童卽以孝行聞及長有聲庠序嘉靖二十六年鄉貢不肯赴春官試或勸之行曰北堂風燭菽水盡歡足矣母卒哀毀逾常身自掬土以葬隱居安貧至老足跡不入城市邑令林一鵠扁旌之曰孝隱繼令周日暹重其賢備禮招之不至造其廬方獲一見以絕甲田四十畝贍之

固辭不受卒年九十二

同上

陳廷俞字允卿封川人以貢生授崖州司訓慷慨嗜義名重縉紳宗伯何維栢贈以詩秩滿陞富川教諭欽州學正先是富川學宮規條未備人文不振俞捐俸金百餘置書籍祭器建尊經閣文運勃興人士思之祀名宦弟廷介字直卿司訓浙之武康周貧生養髦士多躋顯要遷教授不仕而歸杜門恬適邑令程克昌貽詩贈之

吳志

陳天瑞字應奎封川人應歲薦授福建南安司訓陞本省永安學教諭瓊州教授刻苦問學尤篤行誼任職勤以作人家居嚴以義訓動定不違規獲燕褻必正衣冠葢禮教素嫻者也

岑一麒

縣志作麟

字兆祥封川人以貢授平遠司訓丁憂服闋補

本府司訓秩滿擢電白教諭立教貴實行不事浮華平居木

訥至持論則口似懸河好臧否古今人物激勵後學率子姪

尤嚴於敦本土林咸推重之所著有地方議臨封野志俱同上

葉高字子昇封川人家貧力學博聞強記萬厯間由歲貢授

興川縣訓導遷廣西武緣縣教諭董教生徒有胡瑗風居常

嚴氣正性言笑不苟所爲文典贍有根據詩賦莊雅不佻

年家貧授徒多所成就佐邑尹方尙祖編輯縣志臨終遺命

不得作佛事至今世守其訓焉封川續志

葉日煥字光甫號鈍若封川人聰敏嗜學文法先正泰昌間

由恩貢入南監授江南蘇州府訓導尋署教授精賞鑑所許

士必決魏科尤負氣節時有某相國之婿與民爭田相國致

書諄囑裂書不顧而直條其事以上其秉正如此轉廣西興

業縣尹縣有庫吏坐贓積案未決日煥下車爲之解枉吏塑像祀之在任年餘刑清訟簡庭可羅雀以前任失祭器事免官歸父老揮涕扳轅遮道其德化人人如此晚年居鄉厚德邑令黃華允旌其廬曰大老之堂

八天培字日貫封川人由歲貢授江西進賢縣縣丞清勤佐理司道優嘉以漕運有功陞廣西藤縣知縣未至任卒

陳道蘊字宣猷號湖山封川人係出漢陳元之後幼精舉業數奇不第以明經貢於京師初任浙江金華府學訓導敦孝弟正文體立問奇文社作養人才旋攝浦江縣事冰蘖自持明於聽訟慈以催科梓浦陽人物記風勵浦人視事數月陞陝西高陵縣知縣其在陵也救荒恤殘甦解運免火耗嚴守禦崇正乙亥流寇攻城道蘊出戰俘馘最多鄰縣涇陽臨潼

三原之民咸趨而托妻子時有萬戶沾恩之頌暇而葺學宮  
課士子文風一振釋冤獄掩遺骸除衙蠹之惡去行戶之供  
陞河南陝州知州先流寇破城焚掠極慘戶口凋弊十室九  
空硤石之間時有巨寇聚黨二千餘人恣行擄掠道蘊修城  
築寨令民各自守望堵禦有方人咸德之然後招撫逃亡民  
安故業修召公祠奏去雄鎮身任河防克勤保障晉階奉直  
大夫及致政也陝人遮道扳轅監司助以資斧歸休之日仗  
義輕財好行其德宗族鄉黨咸景仰之

俱同上

莫士忠開建人領洪武庚午鄉薦瑞州府教授遷上饒縣丞  
嘗以忠孝清廉薦本縣知縣陳潛忠於朝後值靖難之際進  
香至京以大義極諫忤成祖旨罷歸

縣志

莫敏開建人性嗜學而操行謹飭應洪武二十二年貢選和

門典史公恕廉慎士民悅服當道以學行優長薦擢浙江道監察御史

陳義字葆赤開建人嘉靖三十一年貢素性孝友仁厚處世任饒平訓導却贄講學爲當道獎以才堪揮霍陞武宣教諭攝象州學歲荒賑饑活民數千未幾陞桂林府教授歸田後談經講藝創嚴洞山房立文昌會造就多士年八十七

陳顯開建人嘉靖三十四年貢博通典籍任遷江縣知縣邑小民貧多方撫字士民戴之

陳譽開建人萬厯二十九年貢任韶州府訓導陞會同教諭及歸見邑義倉多累力請除之邑人感戴國儒其曾孫也同

上

植以進開建人目不識書先是父母因貧徙石竇中耕樵父

早喪事母至孝樵採所得悉以奉母食必跪獻母命之起以進答曰世人跪拜於親沒之後親安能知孰若親存少盡禮乎隆慶間山寇充斥以進負母入深僻鑿土室藏之數日一易其處定省跪食雖顛沛不變

吳志

張子奇開建人以萬厯初登極恩賞冠帶粟帛與鄉飲讀律者幾三十年生平敦厚樂善至其却遺金絕夜奔雖行年九旬有四終不以語人通安守張一賜其嗣孫也

縣志

陳元昭開建人萬厯冠帶鄉飲正賓好善仗義孝友睦族其時流寇劫擄昭捐金代贖被擄者以田償昭辭不受厯三朝壽八十有三

黃璉字仲瑚開建人應萬厯九年選貢訓導臨高陞閩興化教授纂射禮儀注大爲督學徐匡岳所鑒賞轉桂陽修黔志



署州篆創學宮從祀名宦所著有借壺軒詩蒲口麥新二編  
華陽洞稿

張應蘭開建人生平志行卓越好義樂施萬厯七年選貢任  
永安訓導補臨武捐俸置田以賑貧生當道厯行獎薦勒石  
垂永比家食修邑志訓族貽謀爲一方表率天啟七年恩贈  
通判子一暘任通安知州

侯用案字允平開建人少能文以親老弗試惟詩酒自娛生  
平鑿山開道運石造橋以利人容縣知縣應遴其子也

侯用賓字允田開建人萬厯十九年貢任順德縣訓導陞晉  
藩教授生平慷慨仗義嘗與友六人應科舉遭羅旁寇六人  
被擄守汛指揮賄之求免上訴用賓不可刦之又不可於是  
遞訴兩院卒使六人保全年九十三卒邑人懷其德義舉祀

鄉賢因明季亂末果子應遠以明經任東莞教諭俱同上

侯應遠字佐熙開建人由選貢任廣西容縣知縣廉以持己仁以恤民值歲大饑鄰邑死亡過半公捐俸設法賑濟存活者數萬人會藤縣北流二邑缺官鄰之父老赴當道陳乞兼攝所至有惠政去後皆立石鐫遺愛焉告歸後與余邑令建丁糧同派議除一邑苦累且倡率修學修橋修路其利濟有足述者祀鄉賢吳志

侯應選字湛一開建人以明經司訓龍門值民變單身出城勸諭眾感悟解散當道獎以才堪揮霍力足扛鼎陞東莞教諭莞之巨宦有害衿士者力為伸之轉崖州學正卒

侯應遠開建人邑庠生例監操行謹飭溫厚和平好施捨樂與人為善人常懷之

饒志學字紹賢開建人萬厯十一年選貢幼有大志篤於經學而孝友天性足以表式鄉閭任昌化訓導賑災恤貧陞柳城教諭其待士好施一如昌化不數月而卒於官士民思之饒家慶字有章邑原生其天性孝友與志學等亦開建人李東陽開建人萬厯三十九年貢任潮州府訓導雅意訓士清恬自守荷兩臺優獎以觀風場有特達之知年尙未艾而卒於官

鄧士新開建人萬厯三十年恩貢天性孝友矩矱可觀任歸善訓導月餘而歿

陳大綸開建人萬厯四十七年補貢任江西大庾二尹清慎處已寬惠及民陞柳州經歷署天河縣俱有惠政及歸士民咸留愛焉子公球崇正十五年貢

鄧起龍開建人天啓三年貢孝友型家端方範俗初任梧州府訓導陞潮陽教諭家貧力學清操自適壽七十六  
侯世勳開建人崇正十七年貢性孝友逢時亂優游林泉怡情詩酒年七十終俱同上

肇慶府志卷十八終

高要周汝珉校字